

УСТАВА НА ВОЛОКИ

И

ДОПОЛНЯЮЩЕ ЕЕ ДОКУМЕНТЫ ШЕСТОЙ КНИГИ ЛИТОВСКИХЪ ПУБЛИЧНЫХЪ ДѢЛЪ МЕТРИКИ ЛИТОВСКОЙ

ИЗДАНИЕ

Императорской Археографической Коммисіи

(Извлечено изъ XXX-го тома „Русской Исторической Библіотеки“)



Юрьевъ.

Типографія К. Маттисена.

1913.

УСТАВА НА ВОЛОКИ


И

ДОПОЛНЯЮЩЕ ЕЕ ДОКУМЕНТЫ ШЕСТОЙ КНИГИ ЛИТОВСКИХЪ ПУБЛИЧНЫХЪ ДѢЛЪ МЕТРИКИ ЛИТОВСКОЙ

ИЗДАНИЕ

Императорской Археографической Коммисіи



(Извлечено изъ XXX-го тома „Русской Исторической Библиотеки“)



Юрьевъ.

Типографія К. Маттисена.

1913.



459719

34(474,5)(091) + 9(И)1 + 9(03)

67.3(4Лит)4 + 63.3(4Боя)4

У 79

„Устава на волоки“, выданная великимъ княземъ Сигизмундомъ Августомъ 1 апрѣля 1557 года, уже давно признана однимъ изъ важнѣйшихъ документальныхъ источниковъ для изученія исторіи господарскаго хозяйства и внутренняго строя Литовско-Русскаго государства. Въ виду этого, она издается нынѣ съ дополняющими ее документами Шестой Книги Литовскихъ Публичныхъ Дѣлъ Метрики Литовской въ извлеченіи изъ печатаемаго въ настоящее время подъ редакціей проф. И. И. Лаппо XXX-го тома Русской Исторической Библіотеки, заключающаго въ себѣ II, IV, V, VI и VII Книги Литовскихъ Публичныхъ Дѣлъ Метрики. Текстъ Шестой Книги Публичныхъ Дѣлъ воспроизводится въ изданіи съ тѣми же приѣмами, которые были приняты при изданіи Книгъ Записей Литовскихъ въ XXVII-мъ томѣ Русской Исторической Библіотеки.

УСТАВА НА ВОЛОКИ

и

дополняющіе ее документы Шестой Книги Литовскихъ Публичныхъ
Дѣлъ Метрики Литовской.

1. Старинная Опись „Уставы на волоки“.

Л. 1 || Реестръ уставы короля его
милости у-во всемъ Великомъ
Князстве Литовскомъ. Летъ
Бож[ъего] Нарож[енья] 1557,
м[е]с[е]ца апрел[я] 1 дня¹.

1. О боярохъ путныхъ и о служкахъ.
2. О бортяхъ.
3. О конюхохъ.
4. О стрельцохъ.
5. О одверныхъ.
6. О осочъникохъ.
7. О войтахъ и въсихъ ихъ повин-
ностяхъ, о переоре меж[ъ] и о винахъ.

¹ Въ послѣдующемъ реестрѣ цифры передъ заголовками артикуловъ стоятъ въ оригиналѣ (въ видѣ буквенныхъ числовыхъ знаковъ).

Примѣчаніе. Книга въ листъ обычнаго формата большинства книгъ Литовской Метрики. Переплетъ новый: картонныя доски; наружная ихъ сторона оклеена сиреневой мраморной бумагой; внутренняя сторона оклеена бѣлой бумагой; корешокъ желтой кожи. На корешкѣ два бумажныхъ ярлыка. На верхнемъ изъ нихъ напечатано: „ $\frac{III A}{6}$ “. На нижнемъ стоитъ: „№ 6 А ПБ. Дѣ“ (буквы „ПБ. Дѣ“ напечатаны; остальное написано чернилами; конецъ ярлыка, послѣ „Дѣ“, оборванъ). Въ виду того, что переплетъ сдѣланъ въ новѣйшее время, на внутренней сторонѣ первой доски его нѣтъ обычнаго въ книгахъ Метрики ярлыка (см. его текстъ въ примѣчаніи на ст. 1—2 XX-го тома Русской Исторической Библиотеки). Наверху внутренней стороны первой доски переплета (слѣва) написано новымъ почеркомъ (чернилами): „№ 6. А“. Составъ Книги Публичныхъ Дѣлъ Литовскихъ № 6 слѣдующій: 1) составленный при Нарушевичѣ „Registr“ первыхъ двадцати артикуловъ „Уставы на волоки“, писанный латиницею, занимающій первую страницу перваго (ненумерованнаго) листа книги; водяной знакъ этого листа — слово „Schweidniz“; 2) самый текстъ книги, начинающійся „реестромъ уставы“ 1 апрѣля 1557 года, — 36 листовъ и начало 37-го листа. Бумага этой основной части книги имѣетъ слѣдующіе водяные знаки: гербъ Топоръ въ гербовомъ щитѣ — л. л. 4, 5, 10, 12, 14, 15, 17, 19, 21, 23, 24, 25, 27, 29, 34 и 36; гербъ Гоздава — л. 6. Остальные листы книги водяныхъ знаковъ не имѣютъ. 37 листовъ текста книги имѣютъ старинную пагинацію славянскими числовыми знаками, передъ которыми всегда стоитъ: „листъ“ или „лист“ (первая передача этого слова въ первой половинѣ книги, вторая — во второй). 37-й листъ оборванъ по краямъ и наклеенъ на листъ новой бумаги, на оборотѣ котораго находится помѣтка Коммиссіи 1835 года съ подсчетомъ листовъ книги (37) и печатью Коммиссіи на концахъ шнуровъ, которыми прошнурована книга.

8. О лавъникохъ.
 9. О местахъ и ихъ повинностяхъ.
 10. О кашъщизне.
 11. О резникахъ.
 12. О коморникахъ въ местахъ.
 13. О корчмахъ.
 14. О торгохъ.
 15. О цыньшохъ и повинностяхъ и о работахъ людей тяглыхъ.
 16. О огородникохъ.
 17. О овъсе и сене.
 18. О серебрящизнахъ съ подданныхъ.
 19. Естъли на роботу подданный не выйдеть.
 Об. || 20. О еолваркохъ у гумънехъ, о севан[ь]ю и ужат[ь]ю и о даван[ь]ю въ отсопъ, о евьяхъ и о семи волокахъ.
 21. О оборе быдла и о скурахъ всякихъ.
 22. О огороды дворные.
 23. О ставехъ и сажавъкахъ и о млынехъ и млынарехъ.
 24. О сеножатехъ дворныхъ.
 25. Где кони въ дворехъ нашихъ стоять.
 26. О листехъ на данину.
 27. О пълатехъ и всихъ иныхъ доходехъ, яко мають выбирать.
 28. О днехъ, личъбамъ назначонныхъ, и о писарехъ скарбныхъ и абы врадъ п[е]н[е]зей пры себе не задержывалъ.
 29. О ревизорахъ, меръникохъ и о помере волочъной и о селидбахъ и о отменахъ имъ, [о] затаенныхъ кгрунътехъ.
 30. О битю на вrade пры ревизору и о усправедливен[ь]ю.
 31. О доходехъ на вrade и о лежъни.
 32. О судеревъныхъ лесохъ, пуцахъ и бобровыхъ гонехъ, о борти, сеножати и оступехъ и лесехъ размеронныхъ.
 33. О вол[ь]ности подданныхъ до пущы.

¹ Въ оригиналѣ: „продети“.

34. О вольности подданныхъ до рекъ и озеръ и часовъ голодныхъ отъходити, будованье и домовъство продати¹ и о пустыхъ и нерозробленыхъ волокахъ.

35. О подводахъ далекихъ и о будован[ь]ю замъковъ, дворовъ, и ажбы врадъ на свою потъребу подводъ не выганяль и о подъводы подъ пенези, о вожен[ь]е до порътовъ.

36. О воженье камен[ь]я.

37. О мосты.

38. О сторожу.

39. О ремесники.

40. О ловен[ь]е рыбъ въ озерахъ.

|| 41. О позвы и децкiе на подданныхъ и о кривды и грабежы, имъ почыненые. Л. 2

42. О мысьливъстве.

43. О злодеехъ и злочинъцахъ.

44. О повинности замъку Виленского и Троцкого.

45. О шьяхъте въ земъли Жомойтской.

46. О волостяхъ Рускихъ.

47. О зештю старость и держа-вещъ.

48. О входы до пущъ, абы никому, одъно подданнымъ даваны на цыньшохъ.

49. О дерево стоячое въ пущы.

2. 1557, апрѣля 1. „Устава на волоки“, данная Великому Княжеству Литовскому великимъ княземъ Сигизмундомъ Августомъ.

Устава на волоки господара короля его милости у-во въ-семъ Великомъ Князстве Литовскомъ. Лета Бож[ьего] Нарож[енья] 1557, м[е]с[е]ца апреля 1 дня.

Артыкуль 1. О боярохъ путныхъ и о служъкахъ.

Бояре¹ путьные стародавньные, а не въкупньные хочемъ мети, абы были на двухъ волокахъ постановены, съ которыхъ абы за вьси повинньности, п[е]незми ошачовавъшы водле кгрунъту, яко люди осадные, платили, а на службу тяглую и въ подводу ходити не повинни; а коли з росказан[ь]я нашего на дорогу поедуть, того году || ничего платити не мають, а безъ воли и росказан[ь]я нашего владу нашему ихъ на дорогу и нигде не посылати; а, будучы на дорозе, служити имъ по-старому; навезька имъ, яко и передъ тымъ, водле статуту; служокъ съ такихъ же боярь ревизорове обирати и не болшь, толко съ потъребу² пры кажьдомъ замьку и дворе нашомъ зоставити мають, которыхъ служба будетъ ездити з листы нашими до дворовъ, оному владови прылегълыхъ, а съ пенязми платовъ нашихъ до Вильни до скаръбу и за кривьдами подданныхъ колею з росказанья владового ездити, а за то имъ на одинъ конь две волоки вольныхъ отъ всихъ платовъ мети, а на потъребу владу ездити не повинньни.

[А р т ы к у л ь] 2. О бортяхъ. Ижъ³ первой бортеве розность въ роботахъ отъ иньшыхъ подданныхъ нашихъ мели, и тепер[ь] ихъ зоставуемъ, абы водле шацунку кгрунътовъ за вьси повинньности, цынъшы, овъсы и сена пенязми з волокъ до скаръбу нашего платили, яко и осадники; а коли имъ на войну ити кажемъ, мають мети тотъ рокъ вольный ото вьсихъ платовъ; а мосты имъ повинньные заробляти и тежъ за росказан[ь]емъ и листомъ нашимъ

мосты имъ неповинньные мостити мають, а за то имъ еолькгу въ цыншохъ нашихъ делати кажемъ подле воли наше.

[А р т ы к у л ь] 3. О конюхохъ седельныхъ и иньшыхъ. Конюхи⁴ седел[ь]ные альбо дворные мають мети по дъве волоки вольныхъ на службу конюшъскую, на которой коли будутъ, маеть бити давано на страву имъ и на вьси потъребы грошей копъ чотыры на рокъ; а которые на службѣ не будутъ, мають платити съ кожъдое волоки по тому жь, яко и бортеве.

[А р т ы к у л ь] 4. О стрельцохъ. Стрельцомъ⁵ нашимъ по две волоки вольные маеть бити дано, а третью на цыншу, хто похочеть, а служба ихъ з росказан[ь]емъ нашимъ въ ловы и на войну.

|| [А р т ы к у л ь] 5. Одверные и иньшые слуги дворные, мешькаючы на посълугахъ нашихъ⁶, мають мети по две волоки вольныхъ отъ всихъ платовъ и повинньности; а которые на съслужбахъ нашихъ не будутъ, абы платили съ кожъдое волоки пенязми водле кгрунъту, ошачовавъшы вси повинньности, а естъли бы которые, зъстаравъшы ся на службахъ нашихъ, дома мешькали, таковымъ обе-две волоки вольныхъ мети, ведже олижъ за листомъ нашимъ господарскимъ.

[А р т ы к у л ь] 6. О осочьникохъ.

¹ На правомъ полѣ противъ этой строки въ оригиналѣ стоитъ: „бояре“. ² На правомъ полѣ противъ этой строки въ оригиналѣ стоитъ: „служки“. ³ На правомъ полѣ противъ этой строки въ оригиналѣ стоитъ: „конюхи“. ⁴ На правомъ полѣ противъ этой строки въ оригиналѣ опять стоитъ: „конюхи“. ⁵ На правомъ полѣ противъ этой строки въ оригиналѣ стоитъ: „стрельцы“. ⁶ На правомъ полѣ противъ этой строки въ оригиналѣ стоитъ: „одверные“.

Ревизоръ¹ з лесничымъ маеть осочниковъ обирати, а не болшь, одно съ потъребу пры пущахъ и ловехъ нашихъ становити, и то намъ, господару, ознаймити, а на службу ихъ по дъве волоки вольныхъ давати отъ цынъшу и всякихъ потяглей.

[А р т ы к у л ь] 7. Войтове² на селахъ мають мети по одной волоце вол[ь]ной, а похочеть ли, маеть ему и дъругая быти прыдана на цыншу, ошачовавши вси повинности и доходы водле кгрунъту; а служба ихъ то — з росказан[ь]я³ вradoвого на роботу и цыншы и съ платы нашими выгоняти и пры отдаван[ь]ю платовъ быти, подданныхъ ку праву место децкого передъ урадомъ ставити, пры работахъ всякихъ⁴ место прыстава надъ люд[ь]ми войтовства своего стояти, пры отъвожен[ь]ю овъсовъ и сенъ до Вильни и инъде з людми войтовства своего ездити и ихъ отдавати, переоры⁵ волокъ не пърынятыхъ, стены, границы и копъцы на кожъдый рокъ межы подданными нашими поправовати и поновляти⁶ подъ виною копою грошей. А где бы отъ которого суседа видель⁷ копъцы альбо границы показоны, маеть то вradoви оповедити подъ тою жъ виною; а судити вrado подданныхъ о вьсемъ дня торгового, кромъ прычины крвавое и кгвальтовъное⁸; о такой вине, коли жъ кольвекъ повелитъ урадъ, ставити ку праву подданого войтъ повинень. А который бы съ подданныхъ войта по-

слушонъ не былъ, а за позъван[ь]емъ || Об. его передъ урадомъ не сталъ, по такового свовольного вrado децкого посылати⁹ маеть, и отъ непослушъного децкованья на милю въ обе стороне грошъ; а пры суде войту быти и справедъливости подданому допомогати, винъ нашихъ ведомость мети и ревизоромъ оповедати и того стеречи, абы вrado винъ и пересудовъ надъ уставу не бралъ. А естъли бы за мовеньемъ его вrado того не пересталъ, маеть то войтъ ревизору оповедити. А войта вrado о вьсякую вину судити, только войтовства въ него¹⁰ не отънимати, ажъ посполу з ревизоромъ дознавъшы вину и неслушъную справу его, и, того скинувъшы войта, инъшого уставити, мужа тое жъ волости неподозраного, на которого поддани зволятъ. Которые войтове и тежъ лавъники по селамъ судовъ жадныхъ судити¹¹, покълоновъ и вымысловъ надъ подданными чынити не мають подъ виною до скарбу нашего рублемъ грошей, одъно, обачывъшы где кольве шкodu нашу господарьскую, урадови и¹² ревизору оповедати, ничего не закърываючы, подъ тою жъ виною. А коли войтовство кому дають, прысегати ему не надобе, кгда жъ вже вина на войта описана. А отъкуповъ урадъ съ подданныхъ за роботу брати не маеть; а гъде бы бралъ, маеть то войтъ ревизору оповедати подъ виною копою грошей. А естъли бы войтъ волоку пустую кому нанялъ, альбо отъ ураду нанятую передъ ревизоромъ

¹ На правомъ полѣ въ оригиналѣ стоитъ: „осочники“. ² На правомъ полѣ въ оригиналѣ стоитъ: „войты“. ³ На правомъ полѣ въ оригиналѣ стоитъ: „ихъ повинностъ“. ⁴ На правомъ полѣ въ оригиналѣ стоитъ: „цынши“. ⁵ На правомъ полѣ въ оригиналѣ: „отвозъ“. ⁶ На правомъ полѣ въ оригиналѣ: „стены“. ⁷ На правомъ полѣ въ оригиналѣ: „копъцы“. ⁸ На правомъ полѣ въ оригиналѣ: „суд в торговый день“. ⁹ На правомъ полѣ въ оригиналѣ: „децкий“. ¹⁰ На правомъ полѣ въ оригиналѣ: „о суд войта“. ¹¹ На правомъ полѣ въ оригиналѣ: „на селахъ не судити“. ¹² Въ оригиналѣ: „к“.

утаилъ, тогды за то скарати его, яко злодея, горломъ. А у войтовство¹ кожъ-дому маеть быти волокъ сто, мало большъ альбо меншъ, водле прылегъ-лости, хотя два и тры села и большей злучыти. А дъя розознанья подъя-ныхъ войтъ маеть мети шнуръ, одъ-накое меры справеный и досветчоный², и часу мокърого альбо сухого жавъжды его лихътовати и досветъчати, и естъли подданыи одинъ другому между пере-ореть и сказити, ино враднику на копу
Л. 4 не ездити, || [пересуду] и проезду³ не бърати, але войтъ между направити и возметъ на томъ, хто⁴ сказилъ, на врадъ дванадцать грошей, а себе за працу чотыры грошы; а вина битая, правомъ переведеная, — дванадцать грошей; а хотя бъ⁵ не переведена, а за объжа-лованьемъ поеднана, — таковая жъ вина; а естъли бу[деть] станеть ся, а не жалуючы владу, поеднають ся, тая вина — шесть грошей, хто едънаеть, и объявити того владови войтъ и лавъ-ники повинъни подъ виною копы гро-шей.

[А р т ы к у л ь] 8. Лавники⁶ въ селахъ по два, по тры, альбо и болшъ, подле великости села, люди неподозраные, веры годные, мають быти становълены, которыхъ повинъность шкодъ межы подданныхъ в ыспасяхъ и въ инъшыхъ речахъ огъледати; и за працу лавънику огъядного отъ шкоды грошъ; за тымъ жо грошомъ то, што ему оказывано, справедливе подъ прысегою передъ ура-домъ сознавати повиненъ, а посьвет-

чыть ли несправедъливе, карати его за слушънымъ доводомъ, яко кривопры-сяжъцу, горълломъ; а безчестья лавъ-нику рубль грошей; нижъли отъ по-тягълей и въсякихъ повинъностей съ поддаными з волокъ своихъ вызволены быти не мають.

[А р т ы к у л ь] 9. О местахъ и ихъ повинностяхъ. Места упрывильеваные прывильевъ своихъ ужы-вати будуть; а которые не вызволены отъ платовъ, мають платити з волоки кгрунту преднего цыншу 50 грошей, а з среднего⁷ кгрунту — 40 гр[ошей], съ подлого — 30 грошей, а зо всякого кгрунту за толоки — по 12 грошей; а з домовъ въ рынку отъ прута — по полъ 8 п[е]н[е]зя, у-въ улицахъ отъ прута — 5 п[е]н[е]зей, зъ огородовъ въ месте отъ прута — полъ 3 пенеся, а з гуменныхъ пляцовъ на передместью отъ прута одинъ пенеязъ, то естъ отъ моркгу 3 грошы; а иншыхъ повинъ-ностей полнити и стацей давати и з листы нашими и върадниковъ нашихъ ездити не повинъни. А войту местъ-скому, где пры⁸ болшомъ месте, по волоце, а пры меншомъ по полъ во-локи ревизорове наши давати ма-ють, за што они повинни будуть
порадку⁹ въ местехъ и пожит || ковъ Об. нашихъ¹⁰ примъножати и догъледати, на подводы складати ся и платити всимъ по тому, яко въ особъливой уставе нашей описано.

[А р т ы к у л ь] 10. Капщына¹¹ одна-

¹ На правомъ полъ въ оригиналѣ: „войтовство“. ² На правомъ полъ въ оригиналѣ: „шнур“. ³ Въ кустодии на об. листа 3 въ оригиналѣ стоить: „пересуду и проезду“. Листъ 4 начинается только словами: „и проезду“. ⁴ Въ оригиналѣ на правомъ полъ: „межу“. ⁵ На правомъ полъ въ оригиналѣ: „вина“. ⁶ На пра-вомъ полъ въ оригиналѣ: „лавники“. ⁷ На правомъ полъ въ оригиналѣ: „цыншы“. ⁸ Въ оригиналѣ: „пры“. ⁹ Въ оригиналѣ: „породку“. ¹⁰ На правомъ полъ въ оригиналѣ: „подводы“. ¹¹ Въ оригиналѣ на правомъ полъ: „капщына“.

кова по всему Великому Князьству Литовскому маеть быти брана, то есть одъ меду — копа грошей, отъ пива — копа грошей, отъ горелъки — 30 грошей; а пры отбиранию капъщны и въписыван[ь]ю въ рейстръ, хто ново прыйметъ, врадъ не большей брати маеть, только отъ меду, отъ пива чотыры п[е]нези, отъ горелъки — 2 пенеzi, отъ волоки — 12 пенезей; а хъто шынъку и волоки не маеть, тотъ отъ воротъ — 2 пенеzi; а обачывъшы лепъшый пожытокъ знаймованья шынъку, вольно будетъ кому хотя наняти, або тымъ же мещаномъ, за ведомостью подскарбего нашего.

[А р т ы к у л ь] 11. Резники¹ вси въ местехъ нашихъ абы ся въписывали въ рейстръ ревизора, а въ небытности его владу; съ которыхъ на насъ маеть быти брано у кожъдый годъ за камень лою по 15 грошей, а особъно на вьрадъ за лопатъку отъ кожъдого быдляти пенеziми дня торгового, то есть за воловую и яловичую — грошъ 1, а за вепровую — 5 п[е]незей, за баранью, коз[ь]ю, телячью — по тры п[е]н[е]зи; а пицого отъ камня лою, то есть отъ пятнадцати грошей на врадъ по 2 пенеzi. Даемъ тежъ вольность всимъ подданымъ нашимъ и чьи кольвекъ будъ, абы дня торгового возили до местъ на торгъ мясо² всякого быдляти битого, почавъшы отъ дня светого Болтрома ажь до Месопустъ; а торговое на вьрадъ такъ же мають давати пенеziми, а большей ничого; а хъто бы здохлое³, шаленое и вьродоватое на продажу прывозилъ, а то на него слушьне переведено будетъ, водъле

права того скарати горломъ, яко еалъшера, для чого подданные наши, б[ь]ючы быдла въ селахъ, мають оказывати лавъникомъ; а хъто кольвекъ мясо на торгъ везеть, тотъ и скуру быдляти забитого зъ собою || взяти маеть для

Л. 5

подозрен[ь]я въ злодействе.

[А р т ы к у л ь] 12. Коморники⁴ въ местехъ быти могутъ, которые жадныхъ работъ на насъ ани на врадъ нашъ делати не мають, одъно, ижъ торговъ и вольностей местъскихъ уживають, и абы тежъ нихъто поблудне а безъ ведомости владу на кгрунътехъ нашихъ не мешъкалъ, мають давати въ кожъдый годъ до скарбу нашего по 2 грошы; и про то владови мають господавы, коморники прыймующы, оповедати для того, жебы межы такими коморники збродня въ местехъ не была.

[А р т ы к у л ь] 13. Корчмы⁵ покутьные конечъне по селамъ абы не были для злодейства и инъшихъ збытковъ, што врадъ забороняти маеть водле статуту; такъ же пива абы нихъто съ подъданныхъ нашихъ на селахъ варыти не смель подъ виною копою грошей на насъ, бо съ того многіе з нихъ въ роспустность и вьбозство прыходять; ведже въ кожъдомъ войтовствѣ а въ слушьномъ селе, злаца пры гостинъцу, можетъ быти корчма за ведомостью владу альбо ревизора посътановълена, одно такъ, яко бы капъщзна наша не гинула; съ которое подданымъ нашимъ кгрунътовъ шынъковъныхъ уживати не заборонъно.

[А р т ы к у л ь] 14. Торги⁶ ничые

¹ Въ оригиналѣ на правомъ полѣ: „резники“. ² На правомъ полѣ въ оригиналѣ: „бите быдл.“ ³ На правомъ полѣ въ оригиналѣ: „здохлое“. ⁴ На правомъ полѣ въ оригиналѣ: „коморники“. ⁵ На правомъ полѣ въ оригиналѣ: „корчмы“. ⁶ На правомъ полѣ въ оригиналѣ: „торги“.

новые подле местъ нашихъ ближай трохъ миль ку переказе местомъ и торгомъ нашимъ абы не были, окромъ торговъ старыхъ, — тые по давъному быти мають.

[А р т ы к у л ь] 15. Цыншу з волоки кгрунту добърого — 21 гр[ошъ], з среднего — 12 грошей, съ¹ подлого — 8 грошей, а з вельми подлого, песъковатого альбо блотливого, — 6 грошей; овъса з волокъ доброго и среднего кгрунту² — по две³ бочьки, а съ подлого — одна бочька, а естъли пенязми за овесъ будетъ казано давати, Об. ино за кожъдую бочьку — пять || грошей, а за отъвозъ бочьки каждое — 5 грошей; съ тыхъ же менованыхъ кгрунтовъ⁴ съ кожъдое волоки сена возъ одинъ альбо 3 грошы за сено а за отъвозъ 2 грошы, а з вельми подлого кгрунту сена и овъса давати не повинъни; нижъли съ кожъдое волоки всякого кгрунту мають давати гусь альбо полътора гроша, куръ двое або пенезей 16, яецъ двадцать або пенезей 4; на неводы грошей два, за стацею грошей⁵ полътретя, а коли стацею кажемъ брати, ино одинъ разъ въ годъ за тые пенязи мають давати съ трыдцати волокъ⁶ яловицу одъну, бараны два а съ кожъдое волоки по курати и по десяти яецъ, а пенезей вже того году за стацію не давати. ¶ Работа⁷ тяглымъ людемъ съ кожъдое волоки по два дни на неделю, а толоки чотыры лете, съ чымъ кажутъ, за што маеть быти отпуцона имъ работа о Божъемъ Нарожен[ь]и тыйдень, о Ме-

сопустехъ тыйдень, о Великодни тыйдень; а которыхъ на роботу не надобе, ино ихъ на осаде посадити, и будутъ давати съ кожъдого кгрунту осады⁸ грошей 30, толокъ 12, або за толоки грошей дванадцать; а за квалъты перво уставъленные — жыта бочька альбо грошей 10; и въже такіе осадники робити ничего не повинъни, кромъ сена, розделивъшы на войтовства тягълые и осадные сеножати ровъно, и то имъ зробити и въ часъ спратати; а⁹ з застенковъ тая повинность, где волока быти не можетъ, отъ моркгу кгрунту доброго — гр[ошы] 3 и пенези 4, а з среднего моркгу — гр[ошы] 3, а съ подлого — гр[ошы] 2, а з наддаръ подлого — полъ 2 гроша, а зъ волоки сеножатное, где могутъ быти дрова и проробъки и сеножати добрые, — 50 гр[ошей], а зъ середніе — 30 грошей, а съ подлое — 20 грошей, а з наддаръ подълое, блотливое або песъковатое, — 15 грошей; а, ижъ вже подданные наши на тыхъ платехъ и повинностяхъ волочъныхъ суть || оса- Л. 6 жоны и постановены, про то жадныхъ стацей давати ани пойдыймован[ь]я чынити на послы наши и чужоземъскіе не повинни.

[А р т ы к у л ь] 16. Огородники¹⁰ пры дворехъ нашихъ мають быти, даючы каждому по търы моркги земъли, а имъ съ того служыти по одъному дню въ тыйдень пешо, а жоны ихъ лете не большъ, одно шесть дней до жънива альбо до полотья будутъ повинъни.

¹ На правомъ полѣ въ оригиналѣ: „цыншы“. ² На правомъ полѣ въ оригиналѣ: „овъсы“. ³ Въ оригиналѣ: „дле“. ⁴ На правомъ полѣ въ оригиналѣ: „сено“. ⁵ На правомъ полѣ въ оригиналѣ: „стацея“. ⁶ На правомъ полѣ въ оригиналѣ: „яловица“. ⁷ На правомъ полѣ въ оригиналѣ: „работа“. ⁸ На правомъ полѣ въ оригиналѣ: „осады“. ⁹ На правомъ полѣ въ оригиналѣ: „застенки“. ¹⁰ На правомъ полѣ въ оригиналѣ: „огородники“.

[А р т ы к у л ь] 17. Овьсы дякольные подданные наши волостные з волокъ мають отвозити¹ до Вильни, до лововъ, до портовъ и до инъшихъ дворовъ нашихъ, где кажемъ, за 20 миль, а сено за 15 миль; а къ тому ещо сена дворного² съ кожъдое волоки по возу одъному отъвезти повинъни, где³ имъ будетъ розказано; а коли дворныхъ сенъ и овсовъ съ потъребу на наши кони быти можеть, тогды пенязми сено и овесъ заплатити⁴; а, отъдаючи овсы дякольные, не мають въ иншую меру, тол[ь]ковъ бочьку⁵ давати, въ которой чотыры корцы Краковъскихъ, подъ стрыхъ, безъ верху и топътанья, а болшей имъ не надобе платити, только вписного въ рейстръ отъ бочки овъса пенязь; и много хто откуль сенъ и овсовъ прыйметъ, маеть съ того квитовати, не беручы за квитъ ничего; а, коли сенъ и овсовъ потъреба наша укажетъ где [и]н[де] кол[ь]ве провадити, таковыя далекости, яко вышей описано, до порту и инъде до дворовъ и лововъ, о томъ за часу, о Светомъ Болтроеку отъ насъ альбо з скарбу черезъ листъ ведомо учынити врадникомъ нашимъ. А съ того не вымовляти ся всимъ подданнымъ нашимъ въ Жомойти и съ Подляское земли. А, ижъ за отвозъ овъса платять подданные од двухъ бочокъ по 10 грошей за 20 миль, то за кожъдую милю прыйдетъ по полгрошъку; тогды таковыя, хто до Вильни, ал[ь]бо где кольве, уставичъне овсовъ не возять, а будетъ на то розказанье наше, ино

Об. сколько миль до порту, альбо где || инде провадити будутъ тотъ овесъ, такъ много имъ зъ отвозовыхъ пенезей отпустити, за милю отъ кожъдое бочки по полътретя п[е]н[е]зя, а остатъкомъ

тыхъ пенезей отъвозовыхъ наймовати судины на отпроважен[ь]е водою такихъ овсовъ до Вильни, альбо где потреба наша укажетъ. А которіе уставичъне овсы возять, ино и того останку отвозовъ на нихъ не брати.

[А р т ы к у л ь] 18. Серебщизна на подданныхъ нашихъ абы николи отъ ловъ и клячъ не брана, одно з волокъ, одънако съ кожъдое, не ужываючи розности кгрунъту доброго и подлого; а з Рускихъ волостей серебщизна по сътарому и тамъ, где померы нетъ.

[А р т ы к у л ь] 19. Работа подданнымъ черезъ войта маеть быти заказана дня неделного, съ чымъ и на который день волость до работы прыйти мають; а войтъ того жъ дня людемъ закажетъ роботу, и который человекъ не выидеть на роботу, ино за первый день огурного заплатитъ грошъ, а за другій день барана, а коли и тьретій разъ огурыть ся або за пъянствомъ не выидеть, ино бичомъ на лавъце скарати, а дни повинъные заробити; а ведже, где бы з якое прыгоды не могъ подданный выйти на роботу, онъ маеть черезъ суседа альбо лавъника владу оповедати, а врадъ, порозумевъшы слущъной прычине, не маеть его некоторою съ тыхъ виною казнити, а инъшого дня заробити повинъное, што змешъкаль, а не отъкупати ся отъ работы никому. Пустыхъ волокъ подданнымъ не пахати; а который, не вписавъшы ся въ рейстръ, смееть то вчынити, збожъе до гумна нашего тратитъ и вины рубль грошей до скарбу нашего заплатитъ. А становити ся ку работе подданнымъ, якъ слонце всходить, а зыйти,

¹ На правомъ полѣ въ оригиналѣ: „овьсы“. ² На правомъ полѣ въ оригиналѣ: „вожене“. ³ На правомъ полѣ въ оригиналѣ: „сено“. ⁴ На правомъ полѣ въ оригиналѣ: „вожене“. ⁵ На правомъ полѣ въ оригиналѣ: „бочьки“.

якъ заходить; а отъпочывъку тымъ, што з быдломъ робять, передъ обедомъ година, въ полудню година, надъ вечоромъ година; а которіе пешо робять, тымъ отъпочывъку и въ тые часы, одно по Л. 7 полгодини маеть быти; а то || лете на великомъ дни отъпочынен[ь]е; а хто рано на роботу не выйдець за огурствомъ, таковой другого дня только часу, якъ омешкаль, заробити маеть.

[А р т ы к у л ь] 20. Оолварки хочемъ мети, абы везде становены, яко наболшы быти могутъ, пры кажъдыхъ замъкохъ и дъворехъ нашихъ, окромъ где бы кгрунъты злые и непожиточны были,—таковые казати людьми осажати, зоставивъшы на вѣрадъ въ кожъдомъ поли по одъной волоце; а то врадъ огородники и своимъ быдломъ заробити маеть, а къ тому моркгъ земли на огородъ, съ чога личъбы чынити и платити не повиненъ. Урадъ нашъ гумъно въ пильной опатрности мети маеть, яко бы въ немъ ни въ чомъ шкоды намъ не было, а збож[ть]я ужат[ь]я всякого маеть мети на себе третій снопъ, отъдавъшы первой десетину и засеявъшы пашъню нашу; а умолоты всякого збожъя ревизорове наши у-во всихъ гумънахъ пры дворехъ нашихъ пробовати мають, и того догъледати и научыти, абы везде з выбоемъ и безъ опилку збожъя молочоны были. А продаванья збож[ть]я гуменного маеть быти на личъбе прынято, по чому врадникъ положить, яко продаваль; для того и дъля всихъ подданныхъ мають быти бочъки въ местехъ торговые, въ дворехъ и гумънахъ нашихъ, въ селахъ и на всихъ гостинцахъ, одънакое меры, по чотыры корцы Краковъскихъ, которыхъ корцовъ на тотъ часъ десеть

¹ Въ оригиналѣ: „клейномъ“.

² На правомъ полѣ въ оригиналѣ: „засеяне“.


³ На правомъ полѣ въ оригиналѣ: „отсопъ“.

⁴ Въ оригиналѣ на правомъ полѣ: „евъи“.

въ полубочъку Виленъскомъ; и тою жъ мерою продавати и засевати пашъню з гумъна и подъ клеймомъ¹ однакимъ такіе бочки держати. А въ гумънехъ нашихъ маеть быти гуменникъ, подданный нашъ, въ той жо волости оселый, чоловіекъ добрый, справный, не подозранный, который на тую службу гуменъную маеть мети волоку, отъ цыншовъ и въсякихъ иныхъ платовъ, работъ || и повинностей вольную. А около засеван[ь]я пашъни урадъ маеть пильность чынити, абы вси засеваны; а гдѣ бы который за недбалостью не засеяль альбо² тежъ пашъню кому наймоваль, а то бы ся слушъне передъ ревизоромъ оказало, таковой маеть дати съ кожъдого моркгу незасеяного або кому нанятого по десети копъ збож[ть]я, о чомъ съ пильностью ревизорове мають ся доведывати отъ войтовъ, лавъниковъ и инъшихъ подданныхъ нашихъ; ведже, где бы въ которомъ году невѣрожай былъ, а такъ много, чымъ бы пашъню засеяль, не нажалъ, маеть о то по науку послати до подскарбего нашего за часу, а подскарбій маеть ему казати старымъ збож[ть]емъ засевати; а гдѣ бы не было, за п[е]н[е]зи цынъшовые куповати альбо з ыншого двора прибавляти, абы ся тымъ николи пашъни наши не зменьшывали; а зъ гумъна нашего жыта въ отсопъ не давати, одно летъ голодъныхъ, и то³ алевъ з нашимъ альбо подскарбего нашего листомъ; а дати то на волю подданныхъ, усхотятъ ли у копахъ альбо молочонимъ жытомъ брати. Евъи⁴ тежъ, где бы врадъ розумяль непотребные, маеть з гумна нашего выкинути, кдъ жъ на быдло и на стадо солома отъ збожъя не з евъи молочоного пожиточнейшая есть; а гдѣ бы евъи мети потреба, тамъ

Об.

459719



оподаць стодоль и стирть у гумьнехъ нашихъ и подданныхъ для небезпечности отъ огня мають быти вделаны. А на заробенъе пашъни на кожъдую волоку абы было оставлено по семи волокъ оселыхъ подданныхъ нашихъ з волю и съ клячами, побълизу двора и пашъни, которые по два дни въ тый-день служыти мають съ чимъ урадь роскаже[ть].

Л. 8 || [Артыкуль] 21. О оборе быдла всякого и о рыкуньяхъ. Пры кожъдомъ еолварку нашомъ хочемъ мети дворничъки, то естъ рыкуньи порадыные, которымъ¹ на рокъ за працу ихъ з нашихъ пенезей по две коше грошей маеть быти давано отъ ураду а тьры бочъки жыта з гумьна нашего, а четвертая съ третего снопа врадничого на выхованъе, для чого пры кожъдомъ еолварку² нашомъ мають ховати прынамъней до двадцати коровъ; а естъли бы такъ много не было, ино з гуменьныхъ п[е]незей купити, колько можетъ который дворъ выховати, и то передъ ревизоромъ оказати, и маеть врадъ въ дойзренью и доброй опатрности быдло дворное мети. А до скарбу нашего отъ коровы дойное не большей платити, тол[ь]ко двадцать грошей, а отъ овъцы старое за волъну на рокъ одинъ грошъ, а отъ молодое по полугрошъку, а прыплодки въ рейстръ писати и ведомости пры личъбе чынити. А где дойные овъцы и козы быти могутъ, маеть съ таковыхъ ревизоръ платъ становити, а врадъ дворничокъ къ тому прымушати маеть, абы и съ того пожитокъ былъ, кды жъ то на многихъ мес[т]-цахъ за добрымъ дозрен[ь]емъ быти можетъ; а где бы ку рыкуньи невестъ альбо девокъ была потъреба, то реви-

зоръ постановити маеть водле великости быдла, которымъ урадь съ п[е]н[е]зей нашихъ наемъ платити маеть; а, старое быдло, скопы и козлы прадаючы, пенези до скарбу нашего отъдавати, а згожое, а зълаща поблизу, до кухни наше отъсылати. А которое быдла здохнетъ, ино за скуру воловую пять грошей, за коров[ь]ю 3 грошы, а инъшого дробного быдла здохлого скуръ не пьлатити въ скарбе, нижъли, сверець стадныхъ скуръ не пьродаючы, оказывати конюшому нашому дворному. А то все ревизорове мають въ бачьности мети и на местъцу пры пописыванью обору въ рейстра писати для того, абы не было забавенъе пры личбе.

|| [Артыкуль] 22. Огороды дворные абы были везде розмероны, съ которыхъ врадъ маеть дати до скарбу съ кожъдого моркгу по 12 грошей; а съ конопель дворныхъ вжо не повинно неводовъ робити; а естъли бы огородныхъ речей до кухни наше потъреба была, тогъды то врадъ маеть отъсылати, где будетъ росказан[ь]е наше, а пенязми вже не будетъ повиненъ платити. Об.

[Артыкуль] 23. Врадники наши, обьробивъшы ся отъ пашъни у-въ осень и на весъне, ставы и сажавки подданными будовати мають, а п[е]незей гумьенныхъ и за рыбы и съ продаван[ь]я старого быдла браныхъ можетъ выдати до двадцати копъ на наемники и на грабары до такое работы; а коли ревизоръ прыедеть, тую роботу и накъладъ ему окажетъ; а гъде бы местъце на ставъ большого накъладу потъребовало, то ревизоръ, огъледавъшы, маеть намъ поведити, а зъ нашего росказан[ь]я

¹ Въ оригиналѣ: „которой“.

² Въ оригиналѣ: „еолварку“.

будеть справовати таковыя ставы; а за працу враннику — съ кожъдого ставу пры спусте десятая рыба; нижъли не спущати ставовъ безъ нашего веданья; а въ спустныхъ ставехъ вранъ и ни хто ины ниякою сет[ь]ю рыбъ ловити не мають подъ каръностью срокгою; а гдѣ пры ставехъ могутъ быти млыны и еолуше, альбо млыны на руду, маеть вранъ казати будовати звычайемъ тымъ, яко ся заховываетъ, намовивъшы ся з ревизоромъ а млынаркомъ, — третей мерка з млива и волоку одъну давати, а дъве мерки на пожытокъ скарбу нашего, и съ тое третей мерки повиненъ млынаръ до работы млына и спустовъ мистромъ быти, и опъравовати и квалтовъ стеречы, и съ помочью подданныхъ гамовати железа, и въси потъребы до млына своимъ накъладомъ маеть справовати, а з волоки до замъку альбо двора, которому посълушонъ, одинъ день въ тыйденъ тесельскою работою служыти; а который млынаръ въ злодействе будетъ досветчонъ, таковой маеть одъпадати права млынарского и отъ млына, а ведже олижъ з явного суда поконаный; а гдѣ бы што вонтпливого въ таковомъ суде

Л. 9 около справы млынарское || было, маеть вранъ иныхъ млынарковъ къ тому везати и, възявъшы порозуменье отъ нихъ, такъ млынара отъсудити.

[А р т ы к у л ь] 24. Сена з дворныхъ сеножателей на вранъ нашъ даемъ пятый возъ, такъ же пятую стирту альбо оборогъ, ровъно кладучы нашъ и врандовый; але вранъ маеть съ пильностью прычыняти ся, абы сеножати дворные не залегали и заросълые выпъравованы и въ часъ покошоны были; а гдѣ бы иначе, а намъ бы въ томъ шкода ся деяла, тогды маеть то намъ нагородити з своего пятого

воза, чого ревизоръ пильне дозрети маеть.

[А р т ы к у л ь] 25. Гдѣ кони въ дворехъ нашихъ стоять, ино, што на тые кони и машталеры пры нихъ выдано будетъ, яко въ нашомъ альбо конюшого нашего листе обърокъ имъ на тийденъ описанъ будетъ, за къвитомъ машталерскимъ, подъ печатью шляхтича, человека доброго, одъного, альбо двухъ, на личъбе прыняти; ведже вранники наши мають въ дозренью своемъ мети, абы овъсы и сена на сторону не шъли, а пры нашихъ конехъ машталеры своихъ коней не ховали бы; а гдѣ посъланецъ нашъ пры конехъ будетъ, тогды одъ того зъ его печатью, а не отъ машталера, квитиъ взяти; и шъто бы тежъ вранъ на узъденицы, попонки и на иншы потъребы коней нашихъ пенезей выдалъ, а то на квите посъланца або машталерскомъ окажетъ, и то такъ же на личъбе ему прыняти.

[А р т ы к у л ь] 26. О листехъ на данину. Абы и тымъ, кому што з ласки наше бываетъ дано, трудности прычыненью личъбы не чынено, про то, кому што отъ которого двора нашего дадимъ, державца або тивунъ оный листъ нашъ, за которымъ поступитъ даное, маеть въ рейстръ свой уписати, и, кгда пры личъбе окажетъ, то маеть быти прынято; а ведже подскарбій о таковыхъ данинахъ маеть въ канцляры нашей ведомость брати, и, естли не згодитъ ся копея того листу з метрыкою канцлярыйскою, повиненъ будетъ вранникъ шкоду намъ опъравити або оный листъ, за которымъ || посътушилъ, ока-

Об.

[А р т ы к у л ь] 27. Платы, серебряныя и въси иныя доходы съ подда-

ныхъ нашихъ отъ ураду и ихъ наместниковъ нигде инде не мають быти браны, тол[ь]ко въ дворехъ нашихъ, а где дворовъ нетъ, ино въ местехъ або на селе, на одьномъ мѣстѣцу, въ господѣ, не поеждчаючи и не посылаючи на села ани въ дома войтовъ, подъ ласкою нашою, чого ревизоровѣ съ пильностью доведывати ся мають. Которые цыншы и въсякіе платы подданные во всѣхъ замькохъ и волостяхъ нашихъ мають почати давати до ураду своего на Светый Михалъ, и такъ будутъ отдавати за напомниманьемъ войта своего ажъ до Светого Мартина, кожъдый пры своемъ войте. А хъто не отдасть до менованого дня, войтъ за розказан[ь]емъ врадничымъ маеть такого ставити передъ урадомъ, а врадъ, доведавшы ся, есть ли, могучы заплатити податокъ, за недбалостью не пьлатитъ, маеть его до везен[ь]я осадити, поколь заплатитъ, а децкованья не бьрати на немъ, тол[ь]ко одинъ грошъ поколодного; а воловъ и коней за цыншъ и ни за што иного не грабити николи. А который чоловікъ не можетъ податку заплатити за тыми прычынами, то есть за пожою, за вымеретьемъ, або за хоробою всего дому, за голодомъ, за побит[ь]емъ граду и за вбоствомъ, такового кгда войтъ посътавить, урадъ, отъ войта, лавъниковъ и суседовъ его того ведомость вземшы, и ещо маеть зосълати до его дому доведати ся досътаточне, и справедливѣ ль то, такового маеть въ рейстръ уписати и пры личьбе въ скарбе оповедати, за которою прычыною не могъ выдати, а подскарбій нашъ пры личьбе маеть отложити на выведанье ревизора; который ревизоръ того жъ году, которого личьбы починаятъ ся, маеть быти посланъ и выведан[ь]е чынити отъ войтовъ и подданныхъ, суседовъ оногo, хто не выдалъ; а дове-

давшы ся такъ невыданныхъ платовъ, яко и волокъ пустыхъ и въсѣхъ речей, што бы з личьбы на къвитехъ до выведыванья описано, и въжат[ь]я гумъна въ томъ лете, маеть свой листъ дати, чого ся доведаетъ коло рештъ, з личьбы оставенныхъ, а тотъ листъ его будетъ мощный, яко || и ськарбный квитъ, въ той речы, и на другой личьбе въ скарбе за оказан[ь]емъ того листу ревизорского маеть быти прынято все, што въ немъ описано; а часу выбран[ь]я доходовъ долъговъ своихъ ихъто на подданныхъ нашихъ отъправовати не маеть.

Л. 10

[Артыкуль] 28. О днѣхъ, личьбамъ назначонныхъ, и о писарехъ скарбныхъ и абы врадъ п[е]н[е]зей при собе не задерживалъ. Къ тому хочемъ мети, абы врадники въ пожитькохъ нашихъ такъ заховали ся, а платы и доходы, што кольвекъ можетъ быти выбрано, отдавали въ скарбъ нашъ, первой свята Божьего Нарожен[ь]я, а отдавшы п[е]нези, маеть взяти квитъ подскарбего къ личьбе альбо скарбного, за который квитъ не мають болшей брать въ скарбе, тол[ь]ко два грошы; а можетъ ли и личьбу учынити на тотъ же часъ, маеть быти слуханъ, и по личьбе, чого справить ся, къвитовати такового; а пенези и личьбу отбирати на замьку нашомъ, где домъ з розказанья нашего усказанъ будетъ; а брати личьбу по рейстрахъ и уставѣ ревизорской, а тамъ, где ревизоръ не былъ, ино по первой уставѣ.

А певъные часы врадникомъ всимъ чынити личьбу складаемъ: отъ Нового Лета напервей личьба починаятъ ся генъвара дня перъвшого зъ земъли Жомойтское, съ тивуньствъ и з державъ тамошнихъ, то есть съ Плотель, съ Телшъ, з Биржанъ, з Бирженянь,

съ Тверы, з Кгондиньки, з Дирванъ обеюхъ половиць, зъ У[ж]венъты, з Ретова, з Шовъдовъ, съ Поюря обеюхъ половиць, з Вешъвень, зъ Ойраколы, съ Коршова; а доконають ся дня 15 того жъ м[есе]ца.

Шестнадцатого дня генвара почнуть ся личьбы з Велены, съ Керстомони, з Росейны, з Ясвоини, з Вилькеи, съ Крожь, з Ботокъ и зо вьсее волости Упитъское, кгда жъ тамъ еолварковъ нетъ; а доконають ся дня первшого еевъраля.

Второго дня еевраля почнуть ся личьбы з восковъничого Виленского, съ ключа Луцького и зо вьсихъ мытъ Об. Волыньскихъ и Подляскихъ, || Рускихъ, съ корчмами, съ Ковенскихъ мытъ и Жомойтъскихъ; а доконають ся личьбы 23 дня, у вилею Светого Матея.

А по томъ еевъраля дня 24 почнуть ся личьбы зъ замьковъ и дворовъ Троцького повету, з Берестья, з Милейчычъ, з Мельника, з Лосичъ, з Дорогичына и съ подымъного, съ Каменца, з Городка, з Высокого, съ Тыкотина, съ Кнышына, зъ Забелья; а доконають ся до дня шостого марца.

Семого дня того жъ м[есе]ца марца почнуть ся личьбы зо Мъстибогова, зъ Зелвы, з Волпы, з Волковыска и зъ войтовства тамошънего, з Лыскова, з Межыреча, зъ Слонимъского старостъва, з Лососиное, з Байкевичъ; а доконають ся марца семогонадцать дня.

Того жъ м[есе]ца осмогонадцать дня почнуть ся личьбы з Белицы, зъ Ожы, съ Перелома и зъ неводницствомъ, съ Перевалки, з Василюшкы, з Острыны, з Мереча и еолварковъ тамошънихъ, съ Коневы, з Дубичъ, з Радуни, з Ейшышкы, з Воранъ, з Волкиникъ и Лепунъ; а доконають ся марца 28 дня.

Того жъ м[есе]ца 29 дня почнуть ся личьбы зъ Олиты, съ еолварковъ и

неводництва тамошънего, з Симъна, з Бирштанъ, зъ Дорсунишокъ, съ Ковна, з Румъшышокъ, съ Кормялова, зъ Сомилишокъ, з Жыжморъ, зъ Жослей, съ тивунъства, городництва и съ ключа Троцького, съ капъщызны места тамошънего и съ капъщызны места Городенского; а доконають ся личьбы съ Троцького повету до дня 7 апрыл[я].

Осмого дня м[есе]ца апреля почнуть ся личьбы зъ замьковъ и дъвировъ повету Виленского, зъ Брасълавля, зъ Опсы и з неводницствъ тамошънихъ, з Дисенъ, з Довькыглишокъ з неводницствомъ, з Ляховичъ, зъ Аины, съ Красъного Села, з Маркова, з Мядела, з Лебедева, з Дуниловичъ, зъ Ушьполь, съ Пенянь, зъ Абелы, зъ Утяны, зъ Оникштъ, || з Л. 11 Вилкомиря, з Воложына, з Болникъ; а доконають ся того жъ м[есе]ца 21 дня.

Апреля 22 дня почнуть ся личьбы з Лиды, съ Трабъ, з Кгераноинъ и съ еолварковъ, съ тивунъства, з неводництва, з городництва, съ ключа и съ капъщызны Виленское, съ капъщызны Новгородское и отъ права Майдемборского тамошънего, съ капъщызны Церыньское и места Менского, съ Крева, з Ошъмяны, з Медникъ, з Любова, з Раканътишокъ, з Виршупъ и з млына Виленского; а доконають ся личьбы повету Виленского мая 5 дня.

Шостого дня м[есе]ца мая почнуть ся личьбы з волостей Рускихъ, напервей з Речыцы, з Мозыра, з Бобруйска, съ Чычерска, съ Пропойска, зъ Омьстиславля, зъ Оръшы, з Любеча; а доконають ся 18 дня того жъ м[есе]ца.

Девятогонадцать дня мая почнуть ся личьбы з Гомъя, зъ Глуска, з Могилева, з Свислочы, з Борысова, з Любошанъ, отъ права Майдемборского и з бобровницъства Полоцкого; а докона-

ють ся личьбы з волостей Рускихъ остатънего дня того жъ м[есе]ца мая.

А иные дворы, которыи кгда будутъ влучоны въ тую справу, мають ити въ личьбе тыхъ дней и въ тые жъ поветы назначоны, каждый ку которому належыть; въ тыхъ часехъ, назначонныхъ личьбы, маеть кажъдый урядникъ первого дня, яко которымъ державамъ описано, ку личьбе становити и оказати ся подскарбему нашему, а подскарбій маеть росказати писаромъ скарбнымъ отъправовати и личьбу брати, ничымъ не задержываючы. И про то хочемъ мети два писары скарбныхъ на прыймован[ь]е личьбы, которыи ижъ бы одностайне, одънакою моц[ь]ю и згодливе брали личьбу, кому подскарбій отъправовати роскажетъ, пыльне догъледаючы пожитковъ нашихъ, а маючы рейстра прошълое личьбы, и, въ чомъ бы вонтпливость альбо шкodu бачыли, не мають того никому замолъчывати, але || подскарбему оповедати, а подскарбій намъ; и во всемъ посълушенство абы чынили ку подскарбему и въсякїе справы нигде индей, одъно ку нему, доносили, такъ же и рейстра личьбъ, съ одного складаючы, ку подскарбему приносяти мають. А безъ ведома подскарбего, яко писары личьбы, такъ и скарбные пенезей прыймовати не мають. А за квиты абы болшей не брали д[ь]яки скарбные, тол[ь]ко по 12 грошей. А не даючы розныхъ квитовъ, вси доходы и пожитъки одного двора съ еолварки а по томъ гумъно со въсимъ господарствомъ на одномъ выписати, и, въ чомъ бы ся усправедливилъ прошълое личьбы, што на ревизора оставълено было, со въсего одинъ квитъ; въ тыхъ же квитехъ описывати, где, въ которомъ ураде што прибавълено, а што зменшало пожитковъ. А за писанье квитовъ

¹ Въ оригиналѣ: „назначоны“.

ихъ д[ь]яки не мають болшей брати, только 2 грошы, хотя бы на аркушу цаломъ и болшей былъ; то всего за одинъ квитъ грошей 14. А надъ то таковымъ писаромъ скарбнымъ з ласки наше зъ скарбу давати на годъ за ихъ службу и на страву, кождому з нихъ, по сту и шестидесятъ копъ грошей, по пятнадцати локотъ одомашъки, а на ихъ слуги и дъяки обеюмъ по поставу сукна колтрышового. Тые жъ писары скарбные не мають ся забавляти своими потъребами на тотъ часъ, личьбамъ назначонный¹, абы ничымъ предлужен[ь]е и омешъкан[ь]е не было въ отправе личьбы; а естли бы который своими потъребами альбо вымыслы которыми день личьбы не беручы, альбо личьбу писары скарбные и скарбный п[е]нези безъ воли и ведома подскарбего прыймовали и, посълушенства ку старшому своему не чынячы, намъ чымъ забавенье въ скарбныхъ делехъ, што бы належало черезъ подскарбего доносити до насъ, а самъ доносилъ, въ чомъ коли будетъ дознань, ижъ, вымышляючы пожитокъ, то себе чынилъ и предлужылъ личьбы, то намъ объявити || подскарбій виненъ; а мы, вины его дознавъшы, съ тымъ учынимъ, што будетъ воля наша. Ведже то все, што бы они видели и розумели шkodного въ пожиткохъ и потъребного ку ведомости нашей, кгда подскарбему объявить, подскарбій намъ об[ъ]явити виненъ, а на што будетъ воля наша, то имъ озънаймити, а они по тому, яко имъ подскарбій именовъ нашимъ роскажетъ, мають справовати ся; а где бы подскарбій того занехалъ, а намъ не оповедалъ, тогды тые писары наши мають то намъ доносити и оповедати, водле присяги своее и повинности ку намъ, пану своему.

То тежъ опатруючы, абы нхъто платовъ нашихъ пры собе не задер- живалъ и личьбу чынилъ на часы на- значоны, про то такъ посътановля- емъ: съ которого бы владу п[е]н[е]зи до Бож[ъ]его Нарожен[ъ]я въ скарбъ нашъ не отъданы, таковому владни- кови, якого стану будь, по Божьемъ Нарожен[ъ]и подскарбій, оповедавъшы намъ, а з волею и за листомъ нашимъ, маеть увосълати дворанина в ымен[ъ]е его, што бы за оную суму стояло, и, естли засътавить въ суме альбо ку которому дворови прылучыть, маеть ся въ томъ водле росъказан[ъ]я нашего заховати; а вѣже таковымъ вымова не будетъ пуцона на съпустошен[ъ]е, зго- ренъе, вымерет[ъ]е и вѣбозство на во- локахъ подданныхъ, але, всю суму сполна алижъ заплатити, то жъ именье з рукъ въ засътавника возметь. А кгда бы маетьность его за то не стояла, а безъ бытъности наше, ино подскарбій его загамовати маеть до науки наше, альбо поколя оную суму всю сполна запла- тити, а то для того, же въ недба- лость речъ нашу господарьскую и земь- ского скарбу положылъ, а недбалъ того, што кол[ъ]ве бы брати могъ, кгда жъ на уставе описано неможнымъ, хто бы не мель чымъ заплатити, абы объ- тяженъе не было, про то на комъ не могъ взяти, маючы такъ много || часу замереного, мель его въ рейстръ упи- сати, а, што выбралъ, то было отъда- вати передъ рокомъ и дѣбати въ речы скарбу нашего; а далее то будетъ на воли нашей, што съ такимъ недбалымъ владникомъ чынити; где бы тежъ ко- торый урядникъ личьбы на часъ на- значоный не пильновалъ, хотя пенези въ скарбъ давъшы, ино, посътерегаючы свовол[ъ]ное недбалости, ижъ великое затъруднен[ъ]е въ скарбе дееть ся, же

¹ Въ оригиналѣ: „прыходы“.

рокъ въ рокъ личьбами уходить, для того по выштыю менованого часу личьбе того повету, въ которомъ оный владъ лежыть, маеть подскарбій, такъ жо за ведомостью и листомъ нашимъ, в ыме- н[ъ]е недбалого увослати и въвезати ся за вѣсю суму, зъ уладу его до скарбу належачую, и такъ долго дер- жати тое именье и пожытъки з него до скарбу чынити, олижъ личьбу вчы- нити и справити ся всего зъ уладу своего; а то чынити и вѣсылати въ таковыхъ имень[ъ]яхъ, не пѣродолжы- ваючы, але борздо после року и часу менованого, а кгда увязанъе дойдеть, оный недбалый не можетъ личьбу чынити, олижъ всихъ иныхъ личьбы того року доконають ся, то жъ его слу- хати въ личьбе будуть, а што з личьбы пры немъ найдеть ся заплативъшы, именье возметь; ведже хто бы съ прыгоды¹, згубы альбо згорен[ъ]я рей- стровъ, смерти и хоробы служебника, который платы отъбиралъ, альбо самъ владникъ зымъреть, жона або дети зо- стануть, и за иными квалтовными пры- годами не могутъ пенезей первой дня на- значоного въ скарбъ дати альбо личьбу чынити, предъ ся маеть стати на часъ назначоный кожъдый альбо черезъ листъ оповедати прыгуду подскарбему, такъ же змерлого жона або дети, а подскар- бій, порозумевъшы прычыне вышой ме- нованой, або хотя бы и не менована, одно слушна, маеть ознаймити и зъло- жыти ему часъ ку даванью п[е]незей альбо ку личьбе, не даючы увязан[ъ]я, а того вѣже часу не омешъкати подъ обовязкомъ верху помененомъ.

|| [Артыкулъ] 29. О ревизорехъ, Л. 13 мерникохъ, о померы волочной и о селидбахъ подданныхъ. Ре- визоры мають быти прысягълые, люди

добрые, сумъненья побожьного, оселые, а не голоты, въ помере волочьной и въ господарстве добре умеетные, абы вмелъ всего достаточне и справедливе выведати и въказати пожытокъ нашъ владови, въ чомъ можетъ причынити; тежъ ревизоръ маеть догъледати, а съ пильностью доведывати ся, абы ни хто з шляхты и подданныхъ нашихъ въ пущахъ на власныхъ кгрунтехъ нашихъ проробъковъ не чынили и никакъ не пърывлащали, и оповедати намъ такъ недбалого владника, въ чьемъ бы ся то ураде деяло. Тые жъ ревизоры мають догъледати, абы отъ мерниковъ селидбы назначываны въ третемъ среднемъ поли, а где бы мерникъ того не въчынилъ, тогды самъ ревизоръ маеть назначити селидбы, а върадъ маеть съ пильностью примусити подданныхъ селити ся на местъцахъ назначонныхъ, чого тотъ же ревизоръ маеть догъледати и въсихъ справъ господарства владового, естли слышьне а радне справують ся, а нерадного и такового, который бы ся не водле уставы и розказан[ъ]я нашего справовалъ, маеть ревизоръ подъ тою жъ присягою, которую¹ обовязанъ, не закърываети, але намъ оповедати и довести того на него, а мы учынимъ съ тымъ, што ся слышьного намъ повидитъ. Ревизоръ, где бы въ ревизии его помера ещо не дошъла або не порадная была, маеть мети до кожъдого двора одного слугу, къ тому [мерника] одьного, черезъ которыхъ померу справовати будетъ, а плату такому слуге на годъ по десети копъ грошей зъ скарбу нашего; а отъ померы знову альбо перемеренья брати мають по десети грошей съ кожъдое волоки, а где бы тол[ъ]ко поправовалъ — 2 грошы отъ волоки; а таковые мерники || естли бы ся неслышьне спра-

Об.

¹ Въ оригиналѣ: „которую“.

вовали и лениво, для своего пожытку мерили, за то ревизоръ самъ маеть отъповедати; естли бы тежъ до кол[ъ]ка дворовъ нашихъ потреба мерниковъ, ино одного уставити и дати тры волоки ему вол[ъ]ныхъ отъ всихъ повинностей, къ тому войтовство одьно, а то вчынити за нашимъ ведомомъ; а не иный хто обирати маеть таковыхъ мерниковъ, одно ревизоръ; а где помера поидеть, мають мерити всякій кгрунтъ купленный и заставъный, кгда жъ кметъ и вся его маетьность наша есть; а писати кгрунтъ, яко велики волоки вдложъ и поперокъ на которыхъ местъцахъ, и, естли бы съ причыны лихого кгрунтъу наддавъки чынили, то мають пры томъ же описывати; а где могутъ быти волоки прогоняные, мерити въ тры поля, въ кожъдое поле 11 моркговъ, то есть у волоку 33 моркги з наддавкомъ; а не могутъ ли быти прогоняные волоки съ причынъ розныхъ, ино моркговати; а где безъ землянскихъ кгрунтъовъ не выпростують ся, таковые земли беручы, нашими кгрунтъы мають отъдавати, где бы земляномъ споручьку ихъ именьямъ, и ровъно, якимъ кгрунтъомъ возметь, и колько такихъ, и такъ много отъдати; а где бы ся ровъный кгрунтъ на отъмену не траѣилъ, ино за волоку кгрунтъу преднего среднимъ кгрунтъомъ полторы волоки дати, а за среднего кгрунтъу волоку подлымъ две дати, то то вчынить за волоку кгрунтъу преднего подлого кгрунтъу тры волоки; а где наддаръ подлымъ, блотъливимъ або песьковатымъ, кгрунтъомъ прыйдетъ отъмену давати, то даемъ на пильное уваженъе ураду нашего, ревизора и мерниковъ, абы намъ и оному, въ кого берутъ, шкода не была, для чого отъмена абы не была безъ ураду

давана; але, хто бы таковое отмены за упоромъ приймовати || не хотелъ, мають зоставити таковую отъмену, уписавъшы до книгъ оногъ жъ ураду нашого, а врадъ маеть напомнимати его о бранье отъмены, на чомъ естли бы не переставаячы и намъ не объжаловавъшы, упорне стени волокамъ и гъраницы казилъ и въ оный кгрунтъ, въ померу взятый, уступоваль ся, того врадъ нашъ маеть моцно боронити альбо правомъ квалту на таковомъ позыскивати. Ревизоръ и мерники мають на то бачность мети, абы ку прылеглымъ замькомъ и дъворомъ села и въсякіе кгрунты наши прылучали, яко ку которому двору ближей а споручъ, а ведже такъ, ижъ бы можности и шырокости врадовъ тымъ таковымъ переменян[ь]емъ въ подданныхъ и кгрунтыхъ не зменьшивало. Тые жъ ревизоры и мерники мають ся доведывати посьполу з урадомъ отъ войтовъ и лавъниковъ и подданныхъ о земляхъ и въсякихъ кгрунтыхъ нашихъ затаеныхъ, або отъ кого кольве забраныхъ, и то намъ, господару, доносити и оповедати водле прысяги и повинности своее.

[А р т ы к у л ь] 30. Всеи врадники наши сами особами своими мають бывати на врадехъ своихъ въ часъ прыеханья ревизора, кромъ пановъ радъ нашихъ альбо тыхъ, которые поселствы и инъшыми посылугами нашими альбо потъребами речы посьполитое обовязаны; ведже таковые врадникомъ альбо наместьникомъ своимъ розказати повинни, абы всякое посылушенство въ нашихъ пожитькохъ ку ревизоромъ и посьлантьцомъ нашимъ мели, около всего ведомость имъ давали, а въ чомъ бы ся яка шкода намъ альбо кривьда подданнымъ деяла, абы врадникъ або

наместьникъ на вrade во въсемъ передъ ревизоромъ отъказываль; а врадники и наместьники мають быти люди добрые, веры годные. А естли бы нашъ врадникъ зъ своего наместьника або зъ слуги за прошен[ь]емъ || отъ войта Об. або подданого справедливости укывъжоному подданому не вчынилъ, ино хотя бъ того слуги не было, повинень самъ панъ передъ ревизоромъ о тую кривьду ему отказывати и съ права всказаное нагородити, а себе на томъ слуге шкоды доходити; а который бы врадникъ о такую кривьду не отъповедалъ альбо нагрожати кривьды и шькоды подданнымъ не хотелъ, то маеть ревизоръ намъ, господару, а въ небытности насъ подскарбему ознаймити, не з[ъ]еждчаючы зъ оногъ вradу, и возметъ науку, яко ся въ томъ заховати.

[А р т ы к у л ь] 31. О доходы на врадъ з ласки наше и о лежни. Во въсихъ замькохъ и дъворехъ нашихъ, где земли на волоки суть розмероны, даемъ з ласки наше господарьское на врадъ нашъ платъ весь з десятое волоки, кромъ овъса и сена, третій снопь з гуменъ нашихъ всякого збожъя, торговое и померное все и за лопатки пенязми дня торгового, десятая рыба пры спущан[ь]ю ставовъ; вина — который подданный на роботу не выидеть — грошъ 1 за день, а за другій день барана; списного — отъ волоки пенезей 14, а где и за овесъ отъбирають — ино отъ бочьки по п[е]н[е]зю, вижованья — грошъ, отъ прысяги — 2 грошы, пересуду — отъ копы грошей 3, децкован[ь]е и помилное слугамъ X кунца, за девькою и вьдовою, кды до другое волости замужъ идеть, — грошей 12, поколодного — грошъ, з нивъ нашихъ — третій грошъ, за скажен[ь]е межы — 12 грошей; нижъли врадъ нашъ за

вины подданныхъ, заруки и ни за што иного лежъневъ въ дома, ани тежъ по коледы Великодные и пожытки вымышленые и о скажен[ь]е межъ въ ежъдчати ани всылати на суды не маеть, чого ревизоръ пилне стеречи и боронити повиненъ.

Л. 15 [А р т ы к у л ь] 32. О судеревныхъ лесохъ и пущахъ и боровыхъ гонехъ, о борти, сеножати, о оступехъ и лесехъ размеронныхъ. Есть некоторые лесы, пущы и дубровы наши, до которыхъ зъ старо || давна шляхта и подданные ихъ уступы и въходы мають весполокъ съ подданными нашими; о таковыхъ пущахъ и лесохъ вси враники наши и ихъ наместъники мають ревизоромъ ведомость чынити и спольне а пилне ся о томъ выведывати, хто за якою справедливостю и з много служобъ людей входы свои маеть; и, выведавъшы певъне, яко много того кгрунту, мають о томъ справу давати намъ, водле которое ведомости великости и малости кгрунту нашего комисары заслати маемъ; а поколь комисары наши на то выедуть, маеть урадь подданнымъ розказати ужывати тыхъ кгрунтовъ по первому, абы з держан[ь]я не выпущоны, а пожытокъ до скарбу съ того множити; ведже, где бы споръ шолъ о речъ ровъную, меньшую альбо мало болшую, нижъли о волоку, тогды таковыя речы можеть врадъ з ревизоромъ альбо съ померчымъ конъчати и становити, не жьдучы зослан[ь]я комисаровъ отъ насъ, абы ся для такъ ровное речы въ замъкненю померы волокъ омешканье не деяло; а врадъ, яко повиненъ, съ пильностью маеть дойзрети, жебыхъмо шкоды

въ справедливости кгрунту нашего не мели. А лесы, на волоки размеронные, где годно, на пашню людми осажати и вольности маеть давати урадь на пять альбо на шесть летъ, ажъ и до десети; а то маеть быти, где чорные лесы, а тяжкые ку выробленью; и то даемъ на баченье врадвое, а ревизоръ, прыехавъшы, вольность оную уважить и цыншь постановити по выседе[ь]ю воли платити водле уставы; ведже таковыя лесы, где бы на пашню згодити ся не могъли, помераючи, не мають прогоняти и пьрорубывати волокъ, одъно, въ коло объмерывъшы и гьраницы положывъшы, пописати довгость и широкость шнуровъ и кол[ь]ко волокъ и моркговъ, яко ся вымерыть, и, зморкговавъшы, на рейстра пописати; а ведже отъ таковое померы меньшы брати, то есть || отъ десети моркговъ Об. грошь 1; а гьде сеножати въ пущахъ нашихъ суть, ино врадъ и лесъничый мають давати ведомость ревизору, а ревизоръ маеть, где бы потреба, до двора нашего таковыя сеножати прыверънути альбо межы подданныхъ на плате роздати. А подданные на козбу вси, кол[ь]ко ихъ наймутъ, одънымъ разомъ мають ходити, оповедавшы ся лесъничому; а ручъницы, пса, рогатины и ничего, чымъ бы звера забилъ, не брати ему з собою. А где бы межы пущою, болота и лесы кгрунту на пашню годного трохъ волокъ меньшей было, тамъ людей не садити д[л]я злодейства и пьрокрадыван[ь]я мыть, але на пьлате роздавати. У-въ оступехъ и ловехъ нашихъ проробьковъ и сеножатея никому не¹ мети водле увалы. Ловы и оступы въ пущахъ нашихъ ревизоры з лесъничыми и тежъ осочники, почавъшы отъ Беловежъ, ажъ

¹ Передъ этимъ словомъ въ оригиналѣ стоитъ зачеркнутое „не“.

до Ковѣна, порадкомъ слышнымъ росъ-
правити и ростесати казати мають на
розъные часы для вол[ь]нейшого пере-
быванья и ведомости о зверу, и яко
много до которого оступу людей потъ-
реба, и о далекости оступовъ мають,
съ пилностью межы собою то посъта-
новившы, въ рейстръ уписати и на
враде зоставити, абы за ведомостью
потъребы певное личьбы людей з да-
лекихъ волостей не гънано, кгда жъ
ся и безъ того обыйти може. А под-
данные наши тяглые и осадные, кажъ-
дый з волокъ своихъ, повинни будутъ
до оступовъ нашихъ пешо ходити и
зъ возми ездити; а поколь¹ въ ловехъ
нашихъ мешькати будутъ, потолокъ на
иньшыя работы ходити не повинни;
але хлопята и старые абы въ ловы
не ходили. Къ тому тежъ врадъ безъ
ведомости, листу и розказан[ь]я на-
шого подданныхъ въ ловы выгоняти не
маеть подъ ласкою нашою. Бортное
дерево наше все || абы врадъ въ своей
ведомости мелъ, чого ревизорове догъ-
ледати мають; дани тежъ медовые
водле старыхъ звычайевъ ити мають съ
пущъ, а з улъевъ домовыхъ и зъ бор-
тей на волокахъ жадинъ съ подданныхъ
плату давати не повиненъ; а за борть
шляхецкую, которая бы ся подданому
у волоце достала, такъ съ пчолами, яко
пустая, маеть быти запълата водле
статуту, то есть за борть пустую 15
грошей, со пчолами—30 грошей; а хто
бы запълаты прыняти не хотель, тому
вол[ь]но борть свою зо пня спустити и
възяти. А во всихъ нашихъ и объ-
чыхъ пуцахъ, где передъ тымъ под-

данные наши бобры на насъ гонили, и
тепер[ь] по первому гонити мають; а
гдѣ бы въ рекахъ и озерахъ нашихъ
ново бобры ся показали, и тамъ ловити
мають; а за працу ихъ брати имъ бобра
пятого альбо почеревъе отъ кожъдого
бобра. А гдѣ подданные въ пуцахъ
нашихъ лазни для входовъ мають, пры
таковыхъ лазняхъ абы конечно быдла
и собакъ не ховали, чого имъ врад-
никъ и лесничый боронити мають.

[А р т ы к у л ь] 33. Вол[ь]ность под-
данные до пуцы наше, хотя жъ и го-
ловное, ведже не гълубоко, мають мети
по дрова, по хъворостъ на гороженъе,
по дерево на будованъе, по лыка, на
свою только потъребу, а не на про-
дажу; а гдѣ для оступовъ закажутъ
имъ, ино, поколь загъраничатъ ревизо-
рове, того вжывати, и то такъ, абы
на одьномъ мествъцу брали, а на дру-
гомъ загаили; а робятамъ малымъ и
невестамъ губъ, овоцу лесного всякого,
ягодъ и хъмелю во вьсякихъ пуцахъ
нашихъ не боронити. А на своихъ
волокахъ подданнымъ вольно забити
волка, лисицу, рыся, росомаку, заеца,
белъку и иншый зверъ малый, такъ
же птахи всякые, и продавати, кому
хотячы, не оповедаючы владу; але
серны, иншого болшого зверу не бити
и на своихъ волокахъ, || а особливе въ
пуцахъ и подъ пуцами нашими ручь-
ницъ ховати и жадного зверу ловити
не мають подъ горломъ. Вол[ь]ность²
подданнымъ до рекъ и озеръ нашихъ
рыбъ ловити крыгою, удою, броднемъ,
трыгубицею, оборомъ и иньшими ма-

¹ Въ оригиналѣ послѣ этого слова стоитъ знакъ (вертикальная черта, перечерк-
нутая тремя горизонтальными чертами). Тотъ же знакъ стоитъ передъ послѣднею
строкою листа 15 об. („в ловехъ нашихъ мешькати будутъ потолокъ“), указывая, что эта
строка должна быть вставлена въ текстъ послѣ слова „поколь“. ² Старинная
опись (см. выше, ст. 4) отсюда начинается 34-й артикулъ, въ который она сливается
и весь 34-й артикулъ настоящаго текста.

лыми сетками урадъ и неводничый не мають заборонити, ни жъли езовъ забивати не могутъ; а м[есе]ца апр[е]ля, мая, іюня¹ ничымъ рыбъ не ловити въ озерахъ, тол[ь]ко для множен[ь]я ихъ въ тыхъ м[е]с[е]цахъ, чого врадъ и неводничые заборонити мають, ведже въ рекахъ вольныхъ² завъжды подданымъ уловъ на рыбы. Подданный убогій и недостаточный часовъ голодныхъ, засеявшы на зиму, кгда отъходить кормити ся, маеть оповедати ся вradoви пры войте и указати убожество и недостатокъ свой, для чого то учинити муситъ; таковому домовъство и засевокъ не маеть быти бранъ ажъ до Светого Яна; а не вернетъ ли ся до того часу, тратитъ засевокъ, и будетъ то все отъдано инъшому безъ покълону врадничого. А который бы человекъ, не оповедавъшы ся враднику пры войте, втекъ з волоки, тая земля зо вьсимъ домовъствомъ, што останеть, инъшому дати, а зъбегълого самъ врадъ и черезъ войта искати мають; а гдѣ найдуть, а выдати не схотятъ, ино правомъ доходити. Пакъ ли самъ отъходень после часу назначоного, альбо збегъ, правомъ зысканный, любо и безъ пра[ва], вернетъ ся, таковыхъ на пустыхъ волокахъ осажати. А естли за кърывъдою отъ врадника и войта выйдеть подданный, а по томъ прыдетъ, ревизоръ винъности его маеть ся доведати и вьважыти прычину, естли прыпусти его ку засевъку и будован[ь]ю альбо ни. Продати на волоце будован[ь]е и

Л. 17

домовъство || подданому вольно передъ урадомъ пры войте и лавъникохъ, а тымъ, хто купитъ, засадивъшы волоку свою, который бы дужъ потягъли тягънути, можетъ у месте або на пустой волоце сести; а тотъ, хто купитъ, не

¹ Въ оригиналѣ: „іюля“. ² Въ оригиналѣ: „вольнымъ“.

³ Въ оригиналѣ: „на“.

маеть большей дати врадникови, только 2 гр[оши]; а записъного въ рейстръ грошъ; а, естли въ томъ ураде нетъ места и волоки пустое, ино ему до инъшого имения нашего вольно ити, вземъшы листъ отъ ураду до оногo, где ся переноситъ, же добровольне вышолъ, волоку осадивъшы, и въ томъ ему передъ урадомъ або войтомъ уистити ся, абы инъде не шолъ, только до волости наше.

[Артыкулъ] 34. Везде пры селехъ нашихъ волоки пустые, ал[ь]бо непърынятые и розробъленные, врадъ и ревизоръ пры бытъности своей людьми добрыми осажати маеть и писати въ рейстръ, которого дня и часу прыймають; съ которыхъ волокъ, поколь ся збудуетъ и волоку напъравитъ, до летъ двухъ, альбо трохъ не маеть большей дати за вси повинъности, только грошей 42, снявъшы жыто и ярыну; а роботы и подводъ, ани которыхъ потягълей не тягънути, поколь ся побудуетъ; а то на узънан[ь]е вradoвомъ и ревизорскомъ — естли близко и лацъно будован[ь]я досягънути можетъ; а прыемъного не брати болшей, тол[ь]ко 2 грошы на державъцу, а д[ь]яку грошъ; а никому пустыхъ волокъ ани сеножатей на нихъ не наймовати и за покълоны ани за скарбные доходы не³ давати пахати никакимъ обычаемъ.

[Артыкулъ] 35. У подводы далекие альбо будованья замъковъ и дворовъ подданые наши повинъны, и водле великости часу помешъкан[ь]я тамъ и далекости дороги мають ся складати съ трохъ альбо съ чотырохъ волокъ на одинъ возъ альбо роботъника одъного, а не маеть ни хъто такихъ подводъ и

Об. работъ замышляти, олижъ за нашимъ листомъ; а за то будетъ || отъпущати подданнымъ съ платовъ за волею нашою водле змешъкан[ь]я ихъ тамъ на той посълузе нашої; а будован[ь]е и воженъе дерева и подводы до дворовъ близкихъ и п[ь]рылеглыхъ, то маеть быти на бачности владу и ревизоровъ нашихъ; ведже, кгда бы што поважного робити мели, мають ся пытати въ насъ, а въ небытности нашої у подскарбего нашего; а старостове и тивунове подводъ жадныхъ отъ подданныхъ нашихъ на свою потребу ани прятелей своихъ брати не мають подъ утратою владу; а в[ь]радники ихъ, где бы ихъ брали на свою альбо чью иньшую потребу, горло тратятъ¹. А кгда владъ едетъ съ пенязми до скарбу до Вильни, тогда войтове колею, по року, кажъдый з войтовства своего, подъ п[е]н[е]зи подводу мають давати, то естъ подъ петъсотъ копъ подводы две, а подъ тысячу копъ подводъ чотыры; и которые съ подданныхъ съ пенязми поедутъ, тымъ со в[ь]сего войтовства того маеть быти складано за кожъдую милю отъ одного коня грошъ 1; тымъ обычаемъ не п[ь]рыдетъ то въ другой волости на войтовство разъ въ кольку летехъ, што маеть быти въ Жомойти и во всемъ Великомъ Князстве Литовскомъ. А гдѣ бы тежъ за листомъ и розказан[ь]емъ нашимъ люди осадные збожъя альбо товары лесные до портовъ возили, тогды имъ въ цыншохъ такъ же еоллга маеть быти уделана.

[А р т ы к у л ь] 36. Естъли бы подданные за розказан[ь]емъ нашимъ листовнымъ камен[ь]е возили, тогды имъ за то въ цыншохъ еоллга маеть быти

вделана водле змешъкан[ь]я ихъ на той посълузе нашої. А на спущен[ь]е дерева съ пущы Марковское вси подданные наши волости тамошнее мають быти на тягълую службу постановени такъ, яко Волъкиницкіе, которые за дъни, имъ повиноватые, дерево и дрова спущати до Вильни будутъ || повинни; а гдѣ бы тая волость водле потребы нашею тому досыть вчинити не могла, мають быти на то отълучоны люди отъ одного альбо двухъ дворовъ нашихъ, которые такъ же на тягълую службу постановити и ку той службе съ потребою ихъ прывернути.

Л. 18

[А р т ы к у л ь] 37. Мосты на мѣстцахъ звыкълыхъ подданные мають робити, какъ бы безпечный переездъ былъ, безъ мостовничого, кажъдый за своимъ войтомъ; а, коли войтъ недѣбале ся заховываетъ, ино владъ его маеть напоменути; и если непослушны подданные войта, ино ихъ владъ кажетъ выгнати ку той работе за войтомъ; а на гостинцахъ и дорогахъ, где мы, господарь, з дворомъ нашимъ едемъ, тамъ за дойзрен[ь]емъ владовымъ звыкълый мосты робити; а за то ничего на подданныхъ владниехъ и мостовничый его брати не маеть. А мостовничый, отъ насъ посланный, маеть только людей боярскихъ у мостовъ доглядати, абы были добре зароблены; а естъли бы подданные наши осадные за розказан[ь]емъ и листомъ нашимъ мосты мостили незвыкълые, имъ неповинные, за то имъ будетъ отъпущоно² съ платовъ нашихъ; а подданными тягълыми мосты робити за дни, имъ повиноватые.

[А р т ы к у л ь] 38. На сторожу замъ-

¹ Въ оригиналѣ: „тратить“.

² Въ оригиналѣ: „отъпушно“.

ковъ и дѣворовъ нашихъ чергою подданные ходити повинъни, але не больше ихъ врадъ брати маеть, одъно яко ревизоръ уставить; а ревизоръ не маеть по особе владу ставити сторожы, тол[ь]ко водле потъребы, великости и важности дворовъ нашихъ; а съ тыхъ же сторожовъ до коней нашихъ, где будутъ стояти, до кожъдое стайни, одинъ сторожъ, а до дванадцати воловъ кормныхъ такъ же одного сторожа.

Об. || [А р т ы к у л ь] 39. Ремесники всякого ремесла мають быти на одной вол[ь]ной волоце ставены отъ ревизора пры всихъ замъкохъ и дѣворехъ нашихъ, водле потъребы, а злаца пры гостинъцахъ и тыхъ дворехъ, въ которыхъ частей бываемъ, то есть тесли, ковали, слесары, колодеи, бонъдары, рыболове, кграбары; а тыхъ ремесниковъ не маеть урадъ до домовъ своихъ посылати, ани роботами своими забавляти.

[А р т ы к у л ь] 40. О о з е р а х ъ¹.

[А р т ы к у л ь] 41. Позвы жадные и дещіе од пановъ воеводъ, такъ же и въ земли Жомойтской отъ старосты, абы не были даваны на подданныхъ нашихъ, але врадъ, подъ которымъ есть подданный, маеть съ нимъ справедливость неомешканую водле права делати; такъ же тежъ, если подданный пановъ радъ нашихъ, зъ особна стану вшелякого, вчинилъ бой якій, кривъду або грабежъ подданнымъ нашимъ, старостове, державъцы, тивуны и ихъ врадники мають подданнымъ нашимъ во вѣсемъ справедливости доводити, такъ, яко бы ся подданнымъ нашимъ на вѣсемъ кривъда и шъкода нагоро-

¹ Дальше въ оригиналѣ оставлено черкнуто).

дила; а посылати владови своего слугу з войтомъ и сълужькою за кривъдами подданныхъ безъ вымовы, которому слуге врадъничому помильного отъ кожъдое мили по грошу, и то, коли || што пре- Л. 19
зыщеть, а не зыщеть ли, на томъ ничего не брати. А хто бы справедливости делати и шъкодъ нагрожати подданнымъ нашимъ за обослан[ь]емъ владовымъ не хотель, ку такому врадъ маеть ся заховати водле статуту; а которые оселости и людей не мають, тогды, вземъшы листъ отъ ураду, ку справе рокъ положыти, а не станеть ли альбо на позовъ отъзоветъ ся, маеть урадъ зосылати, а, съ права грабежъ вчинивъшы, шкодному дати, што бы за его шкodu стояло.

[А р т ы к у л ь] 42. Многіе зъ шляхты и подданныхъ нашихъ, ужываючы мысливъства, збож[ь]я и ярыны подданныхъ нашихъ топъчуть и шъкodu имъ чынять, таковое шкодливое мысливъство маеть быти отъ ураду заказано и боронено; а хто ся не уйметъ, правомъ его о то умовляти и шъкodu позыскивати.

[А р т ы к у л ь] 43. Старостове, державъцы и тивунове абы злодеевъ и иныхъ злочынцовъ карати казали водле статуту, безъ вины злодейское, которая передъ тымъ бывала, а маетьности злодейское и кожъдого злочынцы абы конечно на врадъ и никого иного не брано, одно ее пры земъли, жоне и детехъ зоставовати; а не будетъ ли жоны и детей, инъшого на томъ осадити; такъ же тежъ отъ умерщынъ и отъ бегъщынъ абы конечно брати не съмели, але на той маетьности и томъ кгрунъте инъшихъ годныхъ подданныхъ

чистое мѣсто въ семь строкъ (оно пере-

нашихъ осажали, абы тымъ не мѣно-
жили ся пустѣки.

[А р т ы к у л ь] 44. Повинность
замѣку Виленского панѣ воевода Ви-
ленскій з волостей воеводства своего
Виленского поднялъ ся опатѣровати по
тому, яко зъ стародавѣна бывало, а не
большей, а иншое все и тежъ повин-
ность замѣку Троцѣкого зъ скарбу нашего
опатѣровано быти маеть, кгда жѣ вже
люди на волочѣныхъ платехъ и повинъ-
ностяхъ суть осажоны || и постановены.

[А р т ы к у л ь] 45. Въ земли Жо-
мойтѣской, дворехъ и волостяхъ на-
шихъ шляхѣта, которые были зъ ста-
роства пана Станислава Яновича Ре-
кутя Кезггала и за сына его, пана Ста-
нислава Станиславовича, тые мають
быти вси заховани пры тыхъ же воль-
ностяхъ шляхѣтскихъ; лещъ которые
бы по зешѣтю ихъ и за вкупы своими
зостали бояры, таковые вси абы ровъ-
ного права зъ шляхѣтою не вѣжывали,
и въ повинности волочѣные они и ихъ
земли обернены мети хочемъ, а въ
томъ обовезуемъ повинность урядни-
ковъ нашихъ водле ихъ сумѣненья,
абы сами и з ревизоры и мерники
з великою пильностью того посѣтере-
гали; а кому бы листы наши ку ли-
стомъ старостиннымъ на шляхѣцтво
пруданы были, то маеть быти отло-
жоно на вырокъ нашъ; а ведже и тыхъ
всихъ, которые бы становилъ ревизоръ
на пѣлаты повиноватые, а показали
бы листы пановъ старость Жомойтѣ-
скихъ, тогды тые листы маеть ревизоръ
передъ нами оказати для ведомости
певѣное, съ которыхъ прычинъ того
права и вольности шляхѣтское ал[ь]бо
боярское хто доступилъ.

[А р т ы к у л ь] 46. З волостей Рус-

кихъ меды и инѣшые доходы мають
быти по сѣтарому браны и по тому,
яко на сесѣ часѣ, до инѣшое науки и
посѣтановенья нашего.

[А р т ы к у л ь] 47. Кгда жѣ вже
черезъ ревизоровъ и померчыхъ о
вѣсихъ кгрунѣтехъ и подданныхъ на-
шихъ вшелякая ведомость до скарбу
нашого дошѣла, хочемъ мети, абы по
сѣмерти старость, державецъ и тиву-
новъ знову увяжѣчые подданныхъ на-
шихъ не пописывали, списѣного и ста-
цей некоторыхъ на нихъ не бѣрали
подѣ ласкою нашою и нагорожен[ь]емъ
совите шкодъ подданымъ, одѣно маеть
рейстръ ревизорскій з скарбу нашего
взяти, || або з рейстровъ войтовѣскихъ
во вѣсемъ ся справити, што въ томъ
ураде прыбыло, або тежъ спустошало,
а з якое прычины; которая ведомость
и досвятченье пры враде, войте и лавѣ-
никохъ маеть быти, а по сѣмерти ста-
рость, державецъ и тивуновъ нашихъ,
естѣли бы была потреба всылан[ь]я на
врадѣ отъ пановъ радѣ альбо отъ пана
подскарбего, тогды того жѣ ревизора
послати, который тамъ на ревизеи бу-
детъ; а што съ третего снопа врадни-
чого тамъ зостанеть, маеть ревизоръ
на зешѣлого половицу дать, а дѣругую
наставаючому враднику а собе на вы-
хованье взяти; а што ся дотычетъ
замѣковъ нашихъ украин[н]ыхъ, тамъ
по сѣмерти владу нашего маеть быти
посѣлано отъ насъ або отъ пановъ радѣ
нашихъ, которыхъ владу то належыть,
для осторожнѣности отъ непѣрыятеля.

[А р т ы к у л ь] 48. Хочемъ мети,
абы вси уходы до пуцѣ и лесовъ,
озеръ и рекъ нашихъ и забиванье езовъ
и дерево борѣтное, сеножати и инѣшые
всякѣе пожитки на кгрунѣтехъ властѣ-
ныхъ нашихъ никому иному, одно под-

данымъ местъ и волостей нашихъ отъ ураду на цынъшохъ и пълатехъ нашихъ даваны были для примноженья пожитковъ скарбу нашего, чого ревизорове пыльне выведывати и стеречи мають, жебы то было безъ шкоды наше, абы тежъ такими вступы и въходы за въкупы и покълоны нхъто влостности наше забирати не могъ.

[Артыкулъ] 49. Хотемъ тежъ мети, абы въ пуцахъ нашихъ лесничые никому дерева стоячого на будован[ь]е ани на жадную речъ, для пожитковъ своихъ давати не смели, подъ срогю карностью нашою; ведже лежачое дерево могутъ давати, але не иншому кому, одно нашимъ подданымъ, которые бы на волокахъ своихъ ку ихъ потребамъ лесу не мели.

Об. || А во всехъ тыхъ справахъ коло розмноженья пожитковъ нашихъ и порадности господарства въ помере кгрунътовъ нашихъ обравшы на то первой сего справцою, поручыли есмо державъцы Кнышынскому, пану Петру Фальчевъскому, где жъ и на сесъ часъ подле оногo першого злеценъя и сее уставы наше хотимъ мети: где бы въ которомъ имен[ь]и нашомъ потреба вказывала, абы онъ з нашего розказанъя догледаль и доеждчалъ, яко около померы, такъ и въ иныхъ речахъ, господарству належачыхъ, становячы ку пожитку скарбному подле воли наше господарское.

3. 1557, октября 20. Дополненія и исправленія „Уставы на волоки“, установленныя великимъ княземъ Сигизмундомъ Августомъ.

Того жъ року 1557, м[е]се]ца

¹ Въ оригиналѣ: „если“.

октября 20 дня. Господаръ король его милость и великй князь Жыкгимонтъ Августъ рачылъ поправовати некоторыхъ артыкуловъ, въ той уставе вышей описаныхъ, съ причынъ певныхъ, отъ пана Петра Фальчевъского поданныхъ, и розказуе его милость господаръ, абы на всемъ тые артыкулы ниже описаные при уставе ревизоры оповедали и становили.

Напервей до артыкула третего — О конюхохъ седел[ь]ныхъ и инъшыхъ. То его королевская милость рачылъ розказати доложыти: конюхи, такъ же и вси слуги дворные садити однымъ селомъ въ кождомъ ураде и такъ же волоки || ме-
рыти въ тры поля, и въ среднемъ поли садити, какъ и волостныхъ людей.

Л. 21

До артыкула 25 — О коняхъ. То его королевская милость доложыти розказати рачылъ: кони врадникъ кождый у своемъ дойзрен[ь]ю маеть мети и самъ отъповедати, естли¹ зле будутъ хованы, бо то его королевская милость на врадника, а не на машьталера здавати рачыть; для чого при таковыхъ коняхъ маеть врадникъ своего служебника слати до господара.

До артыкула 4 — О стрел[ь]цохъ. Того его королевская милость рачылъ розказати доложыти: стрел[ь]цы садити межы тяглыхъ людей, пересажаючи инъшыми людми, ижъ бы не посьполу седали.

До артыкула 6 — О осочникохъ. Розказалъ его милость госпо-

даръ доложыти: осочъники на гъраницы Прускіе перенести съ поля, где яко потъреба, двухъ-трехъ; а инъшыхъ обирати съ тыхъ, которые тамъ перемешъкиваютъ альбо осаконы будутъ.

Об. До артыкула 7 — О войтахъ. Росказалъ его милость господарь доложыти: войты тяглые абы мели на войтовъскую службу по две волоки вольныхъ отъ всихъ потяглей || и податковъ; а где села кгрунты и поселен[ь]емъ прылегли собе, тамъ трыста и чотырыста волокъ можетъ одинъ войтъ справовати, злаща где осадные люди, а не тяглые, а большей то въ земли Жомойтской ма быть, кгда жъ роботъ ани отъвозовъ тамъ не становено; а пры обира[н]ю войтовства войтове и лавъники прысегати мають водле первое уставы.

До артыкула 13—О корчмахъ. Доложыти его королевская милость росказати рачылъ: корчмы покутъные кнезскіе, панскіе, злаща где не на гостинцу, абы были гамованы и забираны отъ ураду его королевское милости, хотя жъ бы и листы его милости господарскіе мели, кгда жъ въ листехъ данины его королевское милости описано безъ шкоды таковыя корчмы будовати, а таковыми покутъными корчмами не одъно шкода его милости господару, але и речы посполитой дорогость въ жывности и зънищен[ь]е убогихъ людей.

До артыкула 9—О местахъ. То его королевская милость мети хочеть, абы пры большихъ местахъ войтомъ по две волоки даваны, а въ меньшыхъ, злаща где не на гостинцу, войтомъ по одъной волоце давати на его службу войтовъскую, отъ платовъ и

повинностей вольные, абы тымъ хтивъшые ку порадку были.

До артыкула 20—О зароблен[ь]е. Пашъни по тому его королевская милость заховываетъ, яко нижей описано, ижъ маеть быти на кожъдую волоку еолваркову[ю] зоставлено по семи волокъ оселыхъ, з волы и съ клячами, на заробленье пашъни; а къ тому естли бы врадъ розумель, же тыми людьми пашъни зробити || не можетъ, и будетъ ли того потъреба, маеть толоки збирати на хлебъ дворный, на што з гумъна его королевское милости збожъе взяти маеть; а подданные будутъ винни на такіе толоки ити, и, кгда ревизоръ прыедеть, обачывъшы, што слушъне врадникъ учынилъ, маеть въ ревизей описати, абы то ему на личъбе прынято.

Л. 22

До артыкула 17—Около отдаван[ь]я сена и овъсовъ. Рачылъ его королевская милость росказати доложыти, абы пры отдаваньи овъсовъ и сенъ не давано большей, одъно яко у-въ уставе описано, а войтъ за квитъ не маеть большей дати, только одинъ грошъ служебникови конюшого; а конюшый квитъ до кожъдое державы одинъ маеть дати, за которій не бол[ь]шей, одно 12 грошей брати ему.

До артыкула 29—О ревизорахъ. Поправуючы, его королевская милость рачылъ росказати доложыти: ревизоры со въсею справою своею мають ся з[ь]еждчати до Вильни на певный часъ, который имъ будетъ ознаймень, ижъ бы тежъ и панъ Фалчевскій на тотъ часъ везванъ былъ, и пры немъ справу ревизии своей отдавати и справовати ся повинни въ скарбе, або кому то его королевская милость

поручить рачить; и во вѣсемъ ся съ паномъ Фальчевскимъ порозумевати мають, абы везде одънако справа волочьяная шла по тому, яко въ него у Кънышыне.

Об. До артыкула 23 — О мълынары. Росказалъ его милость господарь доложити, абы млынары з волоки, которая имъ будетъ дана на млынарство, по два дни тесельскою работою || служыли до замьку альбо двора, а не по одному дню, яко у-въ уставе описано вышей.

То тежъ особъливе его королевская милость хочеть мети, абы на пустыхъ волокахъ вол[ь]но паствитъ подданымъ быдло, и жадинъ врадникъ абы не съмелъ грабити быдла подданныхъ на пустомъ, хотя бы и сеножати, кромъ збожъя засеяного на пустовъщизне, съ чого платъ мелъ быти.

О ревизорахъ до земъли Жомойтское хочеть его королевская милость мети, абы ехали и водле першое науки справовали ся; ведже где покажетъ ся въ рейстрахъ померчыхъ, што будетъ наддавки давали на кгрунты подлые, таковыхъ волокъ знову шнуромъ не пьробовати, кгда жъ то панъ Фальчевскій поведилъ, же во вѣсихъ мерникохъ есть въ рейстрахъ описано, што назвышъ на которую волоку дано и з якое прычины, и пьро то таковые рейстра мають быти даны до скарбу, абы ведомость была всякого кгрунту въ земъли Жомойтской въ скарбе.

Есть¹ тежъ воля его королевское милости, абы съ пенезей, зъ гуменъ браныхъ за зъбожье, быдло до еолварковъ панове врадники куповали,

1 Въ оригиналѣ: „Есть“.

звлаща коровы, а съ того пожитокъ до скарбу его королевское милости прымножали, чымъ тежъ и ролы еолварковъ направовати ся могутъ; а што такихъ пенезей гуменъныхъ на быдло выдавати будутъ, на личбе маеть быти прыймовано.

4. 1558, мая 20. Инструкція, данная великимъ княземъ Сигизмундомъ Августомъ ревизорамъ и мѣрникамъ.

|| Лета Бож[ьего] Нарож[енья] Л. 23 1558, м[есе]ца мая 20 дня.

Господарь король его милость и великй князь, росказавшы розсылати ревизоровъ и мерниковъ, рачылъ поручити то озънаймити и ку той справе доложити, же вси они, ревизоры и мерники, въ небытности его королевское милости въ тутошьнемъ панстве едучы на ревизею и на померу, такъ же и з[ъ]ехавшы зъ справы и з ревизеи своей, мають зъездчати ся съ паномъ Петьромъ Фальчевскимъ, яко жъ съ тымъ, который коло порадку того господарства з ними намовляти [маеть], и чого бы которое имен[ь]е господарское потъребовало, такъ въ порадку померы, яко тежъ и въ господарстве а пожиткохъ его королевское милости, имъ раду и науку давати будетъ и, въ чомъ потъреба, докъладати ся будетъ пана воеводы Виленского, маршалка земского, канцлера Великого Князства Литовского, старосты Берестейского, державъцы Борысовского и Шовьленского, его милости пана Миколая Радивила, кгда жъ господарь его милость на пана воеводу Виленского то преложити рачылъ отъ его милости, абы панъ Фальчевскй и вѣси таковые,

Об. въ тую службу ставъленные, способъ-
ляли ся наукою, помоч[ъ]ю и обороною
и во всихъ справахъ, што бы ся сте-
гало¹ коло пожитковъ || и кгрунтьовъ
господарьскихъ.

Къ тому, будучы они на таковыхъ
службахъ его королевское милости,
мають, съ паны вранники именовъ его
милости господарьскихъ порозумеваючы
ся, догъледати, а гдѣ ся подданные роз-
делили, а мьного ихъ въ одномъ селе,
а на маломъ кгрунтьте, таковыми абы
пустые волоки осажываны, зоставивъшы
брата одного або двухъ на волоце, або
отъца зъ сыномъ; а давати имъ воль-
ность, на пустыхъ волокахъ осажыва-
ючы, для запоможен[ъ]я, яко вышей
описано.

Тежъ абы того вранники догъле-
дали, а[бы] подданнымъ гдѣ ку розробъ-
леннымъ волокамъ лѣсы прыданы для
будован[ъ]я и дъровъ, такъ местскимъ,
яко и волостнымъ, ажъ бы только на
свою потъребу брали, а не продавали.

Што ся дотычетъ стрел[ъ]цовъ, на
томъ господарь его милость застановить
рачыль за ихъ чоломбитьемъ: ачъ на
уставе описано не давати имъ цынъ-
шовъ з двухъ волокъ, але ижъ тепер[ъ]
большій почоть ихъ, нижъли первой
было, и пѣро то подвезали ся сами пла-
тити цыншы и осады со всякими по-
винностьями такъ, яко и осадные люди,
п[е]незми, кромъ работы и потягълей,
и господарь его милость розказуетъ
кождому з нихъ дати по две² волоки
осадити ихъ селы и на добрыхъ кгрунть-
техъ, и подал[ъ] пушы, а они мають
одну волоку мети вольную отъ платовъ,
а з другое платити будутъ цыншь и
весь податокъ такъ, яко иные осадные
люди; ведъже ани сена ани овъса, [а]ни
жадныхъ отъвозовъ альбо подводъ и

потягълей не повинни, || тол[ъ]ко голый
цыншь альбо платъ давати имъ до
владу на часъ, волости ознайменый, за
ведомостью служебника пана Довойно-
вого; а судити ся имъ, стрельцу [съ]
стрельцомъ, передъ тымъ, кого панъ
Довойно уставить надъ ними; а коли
съ кимъ иньшымъ судъ, ино пана До-
войновъ слуга за обосланьемъ з уладу
маеть становити на судъ вранничый
и самъ на томъ суде маеть быти и пос-
поль з уранникомъ судити.

А гдѣ бы ся прыгодило съ подданнымъ
нашымъ судити стрельца о покаженъе
або о переоран[ъ]е межы, по тому жъ
маеть вранъ нашъ або войтъ волостъ-
ный посъполь съ тымъ служебникомъ
пана Довойновымъ тую речъ судовне
подле уставы наше застановити.

А пры роздаванью волокъ стрел[ъ]-
цомъ маеть тамъ быти служебникъ
пана Довойновъ.

**5. 1558, іюня 20. Постановленія
великаго князя Сигизмунда Августа
(по совѣщаніи съ панами - радою)
объ отправленіи подводной повинности
городами, мѣстечками и Русскими
волостями (гдѣ еще не произведена
волочная помѣра), о налогѣ на тор-
говлю, „шынкъ“ и ремесло и объ ор-
ганизациі подводнаго дѣла.**

Лета Бож[ьего] Нарож[енья]
1558, м[есе]ца іюня 20 дня. Гос-
подарь король его милость и
великій князь Жыкгимонтъ
Августъ рачыль намовляти
съ паны радами ихъ милостью
и вырокомъ своимъ госпо-
дарьскимъ о даванъе подводъ
на томъ застановити, якимъ
обычаемъ маеть быти пора-

¹ Въ оригиналѣ: „стечало“.

² Въ оригиналѣ: „дле“.

Об. докъ справы и повинности тое земьское становень во вѣсихъ местехъ, местечъкахъ и волостяхъ Рускихъ его королевское милости, кромъ мѣсть || упрывилъеваныхъ вольностью отъ подводъ, а ведже и въ таковыхъ местехъ на пѣредмѣстью перемешъкывающы абы платили по тому, яко ниже описано, не выймучы съ того никого, и чый кольвекъ человекъ сидитъ въ мѣсте господарскомъ и на пѣредмѣстью, о[д]нако платити маеть, яко и мещане.

Мещане всихъ мѣсть абы давали съ кожъдого дому по два грошы; а хто волоку держыть, тогды особно отъ волюки маеть дати тры грошы, а з морговъ пры мѣстехъ по чотыры п[е]нези, а отъ прута огородного мѣстьского одинъ пенязь; а где волокъ еще нетъ, ино з дому два грошы, а съ еолварка мѣстьского або съ пашни по шести грошей; а въ которомъ еолварку люди, ино [съ] служъбы по шести грошей, а отъ огородника по два грошы. А Рускіе волости, где волюки не мероны, могутъ з дыму дати такового, въ которомъ земъли своее и особного хлеба ужывають, грошы два съ хлеба, а з дерева бортного грошы тры з лезыва; а хъто того обойга не вжываеть, только на огороде сидитъ, тотъ отъ огорода грошъ одинъ дати маеть; а хъто и огорода не мель бы, тотъ маеть з дыму дати польгроша.

А то устава на товары, на шинкъ и на реместники. Хто едwabными речми торгуеть — чотыры

грошы; хто только сукъны и иными крамными товары — тотъ маеть дати два грошы; а отъ золотара || — такъ же два грошы; хто шинкъ, корчмы держыть — тотъ отъ меду одинъ грошъ, а отъ пива одинъ грошъ, а отъ горельки два грошы; резники, кожъдый, того ремѣсла ужывающы, одинъ грошъ винень дати; кравцы, кушънеры, шевъцы, ковале, слесары, столяры, бондары, колесники, стельмахи, рымары, сырOMETники, дуботовъки, седлары, гончари¹, токары, скляр[ы], пекары и кожъдого ремѣсла хто кол[ъ]ве ужывати будутъ и обходити ся ремѣсломъ, въ мѣсте седечы, маеть з ремѣсла такового дати одинъ грошъ, але отъ товарышовъ не повинень платити; а, отъдающы тые доходы, бирчого и писчого не повинень большъ дати, только одинъ пенязь, хотя мало альбо много дасть.

Ведже хто бы съ таковыхъ купъцовъ альбо з ремѣсниковъ хотя однимъ товаромъ съ тыхъ речей менованыхъ и на одинъ разъ въ мѣсте торговаль, альбо ремѣсла ужываль, тогды тое жъ отъ товаровъ своихъ и ремѣсла маеть дати и заплатити, яко и тые, обецъне въ мѣсте перемешъкывающы, платечы то на раты уставленны, — вольно ему будетъ на цалый годъ такового торгу ужывати; и для того вси купъцы и купъчыки во вѣсихъ мѣстехъ таковыхъ, где подвода идетъ, мають уписати въ рейстръ урадовый, чимъ торгуеть; если жъ того не всхочеть, а тѣраеть ся едwabные або якіе иные не звкълые въ его купецстве товары, тогды маеть заплатити отъ того по сей уставе и вольность мети тымъ купъчыти, отъ чого заплатити.

А отдавати тые пенези до враду замъковъ и дѣворовъ его королевское

¹ Въ оригиналѣ это слово написано надъ строкою, болѣе черными чернилами.

Об. милости, на две раты розложывъшы: на Новое Лето половицу, а другую половицу на Святой Якубъ, а после¹ року у двухъ неделяхъ кожъдый вранникъ маеть до скарбу отъдати; а землянскіе люди, хто повиненъ || носити подводу подле уеалы земское, на сойме вчыненное, мають платити зъ служъбы по шести грошей, и на тые жъ роки повинъни вранники господарскіе отсылати тые пенези до скарбу его королевское милости, а за тые пенези кони на подводы наймованы быти мають.

И во вьсихъ местехъ и селахъ, где потъреба, а вызволены места отъ подводу, на пьредместью, хотя где до сего часу подвода не давана, мають ховати кони на наемъ подводы.

А гьде волоки суть, тые мещане будутъ ховати кони, которые волоки держать, и сътеречы подводы переменою по неделямъ у ровности; а мети кони каждому по два; а хъто всхочеть большей мети коней на таковой наемъ, ховати то на его волоки.

А войтъ кожъдого такового местечька и села маеть два кони ховати и отъ даванья податку оногo будетъ воленъ для того, абы порадку даван[ь]я подводу догъледали; и станеть ли омешъкан[ь]е гонцу, то войтова вина, и сърокгая карность на него отъ подара короля его милости взложона будетъ.

До вьсихъ замьковъ и местъ не мьногіе дороги и гостинцы росписати отъ столечьного места Вильни, абы чужоземьцовъ збегомъ и шьпекгомъ, лихимъ людемъ, вольный проездъ, а мыту господарскому шкода въ прокрадыванью купьцовъ не была; а къла-

сти гостинцы што напъростей можетъ быти; и такъ по вьсей земьли розложити гостинцы и станы певьные, на которыхъ подводамъ отмена маеть быти; а не становити подводы нигьде большей семи миль, а меньшей трохъ, и то алижъ бы инакъ не могъло быти, але въ чотырохъ, въ пяти, || въ шести миляхъ отъмену становити, хотя и въ князскихъ, панскихъ местахъ и селахъ, где подводу носити повинно.

А коли прыйдетъ посоль великій альбо отъвозъ речей господарскихъ, на што бы таковыхъ коней большей потреба, ино тое место альбо село мають ся способляти, яко бы тыхъ коней водле потребы зготовали, бо о таковой потъребе могутъ передъ часомъ ведати; а которые то повезуть, такъ мещане, яко и волощане, абы имъ такъ же плачно помильное, яко нижей описано.

Въ чомъ хотячы порадокъ учынити, постановити, абы въ дому войтовомъ, бурмистровомъ альбо лавъниковомъ подводе отмена была, и маеть быти плачно отъ коня по гьрошу на милю, такъ же отъ подводного, яко и отъ того, на которомъ проводникъ ездитъ, а отъ возовое подводы однимъ конемъ — полътора гроша на милю, а отъ двухъ коней до одъного воза — полътретя гроша на милю; а естли бы своимъ возомъ двема коньми повезъ, тогьды отъ воза з двема коньми тры грошы маеть быти дано на милю.

И естли бы тежъ тотъ подводникъ мусяль и назадъ на той же подводе нести гоньца, ино ему платити по тому жъ; а не понесеть ли гоньца, тогьды платити не надобе; а маеть гонецъ и кожъдый посъланецъ наемънику п[е]н[е]-зи вси заразъ дати, а то для того, абы

¹ Въ оригиналѣ: „посьме“ („ь“ въ серединѣ слова подправленъ болѣе черными чернилами).

ратовати могъ, естѣли конь рознемо-
жетъ ся або здохнетъ, штобы мель за
што иного коня наняти, а не омешъ-
кати гонъца.

Об. || Въ даван[ь]ю подводъ ма-
ють ся такъ заховати. Гонецъ
маеть ехати до владу господарьского
за листомъ господарьскимъ подводнымъ,
а върадъ войту альбо бурмистру и
лавънику, тому, хто на то уставленъ
старшымъ, кажетъ ему подводы дати,
колько на листе его милости господарь-
скомъ либо на листе пановъ радъ, такъ
же и на листе старостъ и державецъ
укъраинныхъ описано; и напишетъ на
листе подводномъ, которого дня бралъ
подводу, абы за однимъ листомъ, естѣ-
ли не описано въ листе, не бѣрали
подводъ по двакротъ, яко то много-
кротъ чынили до сего часу. И будутъ
озънаймены особы певные пры дворе
и скарбе его милости господарьскомъ,
таковые, хто тые пенези на подводы
роздавати маеть зъ скарбу; беручы
которые, отправуючы[e] гонца давати
мають на наймован[ь]е подводъ, яко да-
леко едетъ, на кожъдую милю по од-
ному грошу, а на страву ему только
жъ на особу его, а слугамъ его, колько
съ нимъ будетъ, такъ же по одному
грошу, и назадъ на страву мають ему
платити; а онъ вже будетъ наймовати
и платити таковымъ, которые обѣраны
ховати тые наемные кони; нижъли
хто возомъ едетъ, тотъ не такъ ся
борздо посъпешить, для того и на страву
маеть ему дано быти на милю поль-
грошъкомъ большъ; а ведже маеть
быти розумяно на таковыхъ гонцовъ,
который самъ одинъ з слугою або з
двема посыланъ бываетъ; а хто з боль-
шымъ почътомъ едитъ, таковому маеть

¹ Въ оригиналѣ: „бити“.
„маеть“.

быти большею дано, водле особы и по-
требы, на што тотъ, хто въ справе
своей то мети будетъ, || маеть бачнымъ
быти¹ и з волею его королевское ми-
лости такимъ посъланцомъ отъправу
чынити.

Л. 27

А дворане, на подводе едучы, черезъ
перемену не мають² далей на той под-
воде ехати; а въ перееждчыхъ тежъ
людей коней не мають³ брати; а естѣли
бы то вчынилъ, тогды совито пови-
ненъ будетъ шкodu нагородити, а за
такъ неповъстязливый высътупокъ
две недели у везен[ь]ю седети, а на тую
послугу николи посыланъ не будетъ,
абы тымъ ся и иные карали; нижъли,
естѣли бы подводный конь усталъ альбо
здохъ, тогды маеть оный гонецъ въ
перееждчого чоловека альбо где на
селе пры гостинцу коня наняти, а пѣро-
водникъ тому, чый конь будетъ, запъ-
латити маеть такъ жо, яко ему плачоно,
кды жъ п[е]н[е]зи за наемъ отъ гонца
взялъ, для того абы посъланцомъ его
королевское милости, ихъ милости па-
новъ радъ и з укъраинъ потребамъ
земьскимъ нигде ся не омешъкивало;
а з укранъ мають панове воеводове,
старостове и въсякые владники посы-
лати, даючы свои пенези на подводу;
и кды прыедеть таковой посъланецъ,
ино, взявъшы ведомость съ канъцеля-
рей, съ какою справою посъланъ и хъто
посылалъ въ земьской справе, тако-
вому кожъдому черезъ посъланца его
маеть быти запълачно за наемъ под-
водъ; а хъто для своее потребности шлетъ,
тотъ своимъ накъладомъ отъправуй, а
господарьскихъ подводъ не працуй, для
чого, въ земьскомъ деле шлючы, своихъ
потребъ на таковыхъ посъланцовъ не
въкладати, жебы тымъ не омешъки-
вали справамъ земьскимъ, ождаючы

² Въ оригиналѣ: „маеть“.

³ Въ оригиналѣ

Об. такимъ деламъ пана своего отъправы, але || гонецъ з деломъ его милости господарьскимъ и земьскимъ отъправовати ся спешъне маеть, ничымъ инымъ не забавляючы ся.

6. 1558, октября 20. Дополненія и исправленія постановленій отъ 20 іюня 1558 года (№ 5), установленныя великимъ княземъ Сигизмундомъ Августомъ.

Того жъ року [15]58¹, м[е]с[е]ца окт[ебра] 20 дня. Его королевьская милость рачыль розказати до тое уставы на подводы прыписати:

Купъцы чужоземьскіе, которые коль-

векъ до панства его королевьское милости прыжеждчають съ торговлями, а домовъ своихъ не мають нигде въ границахъ панства его королевьское милости, на таковый податокъ для наймован[ь]я подводъ не винни складати ся, кгда жъ мыто платять.

Што тежъ описано вышей въ той уставе, абы, на две раты розложившы, тотъ податокъ отдавали, его в[о]р[олевская] милость² хочеть мети, жебы завъжды тотъ податокъ отдаванъ на Новое Лето, и таковый податокъ жебы врадники завъжды пры цыншохъ отбирали.

Остаеѣй, маршалокъ и писарь.

¹ Въ оригиналѣ: „57“ (славянскими числовыми знаками). „млти“ (подъ титломъ).

² Въ оригиналѣ: